

李邕

竹居狹廬

全唐文

卷二百六十二之二百六十五



欽定全唐文卷二百六十二目錄

李邕二

端州石室記

崧臺石室記


越州華嚴寺鐘銘并序

滑州大廳銘

大照禪師塔銘

晴熱帖

藤偈



國清寺碑并序

葉有道碑并序

秦望山法華寺碑并序

兗州曲阜縣孔子廟碑并序

法華寺碑并序

秦望山碑

葉有道碑

兗州曲阜縣孔子廟碑

欽定全唐文卷二百六十二

李邕二

端州石室記

日者託宿祕篆寄傲神府撰竒討異注靈通感冥搜海壘
遐矚坤極敞金闕疏玉堂河漢未矚其源今昔罕聆其語
曷若宛此山郭介在江濱薄人寰騰物外妙有特起靈表
瀕洞綺田砥平錦嶂壁立肇衍洞穴延袤中堂感怪形以
萬殊研地勢以千變伏虎奔象浮梁抗柱激濤海而洪波
沸渭飲杳窳而羣峯差峩飛動逼人屹聳驚視密微微而

三分地道風蕭蕭而一變天時竇乳鍊於玉顏石牀列於
仙座隔閔塵境延集福庭寂兮寥兮恍兮惚兮使營魄九
昇嗜慾雙遣形若希羽翼志若摩雲天秦漢之間莫知代
祀羲皇之上自成遐邈當是時也慕名者執雌而退徇物
者守心而安求道者息慮而凝懷書者陋古而默有若邦
伯畢公守恭廣孝聞家至忠觀國政門尤跡談者不容於
口義心厚行遊者每藉於名故能更修其方人樂其業流
冗歸止介特又安於是命友僚縱琴酌一歌一詠以遨以
遊莫不解榻於斯張樂於斯騰駕五龍遣去駟馬豈惟避

暑窟室締賞林巒擊石如鐘酌泉如醴固亦轉丹竈掇紫
芝迹參寥之遠心推習隱之幽致者也

崧臺石室記

高要郡北五里有石室詭怪萬狀崆峒其中發揮靈蹤盤
薄厚地皆神仙之窟宅爲區宇之勝槩有巨石皆似蹲獸
之類疊花仰空的礫瓊脂色如截肪傍引穴竅疑爲洞門
橫聳石牀出次仙座東廂峭壁下有涵泉漲澄鏡色味輕
瓊漿東西倚山之陽二十餘里西通武林東抵嶺岬峽

越州華嚴寺鐘銘并序

有同乎源播厥派者夥哉沿之椎輪則終列大輅革以穴
處則崇構厦屋譯梵言於華學象楫槌於景鐘從來久矣
觀其聆訕音獎宏誓艾苦趣警禪門劒輪疑在空法眾斯
集鏞之時我大矣哉郡司寇北平楊公沙門師萌抵淨根
保耳界妙有忠爲迦維之業堅樸象正之鈞嘗慨靈越樂
勺吳通邑雖經行大壯塔廟藝釋訓乃首唱羣吏傳聞
庶氓合德悉心聚糧殫幣鑠文馬以庀製驤羣龍以範鍾
撰祥時厯今日傾郭鄙畢緇黃舉帆雲屯擊轂雷動百丘
勇施累讚願言者計以萬億然後陶人事爐火正疏冶風

旧鼓橐樂工楊嬉疑煥乎鼎凍蔚焉邱峙手舞者翳景稱
慶者振林遲明歲功亭午卒此於是曾臺大起雕簷懸列
魚魚叱怒以震擊蒲牢跽曲以以噉隱天綱營地理刹那
昭應一念信心有無識生幽執鬼物吳不休復淨域貞觀
真諦矣有若大者不楸小者不窕則州鳩之聽曷以臻其
間歟其詞曰

大雄立號兮考彼華鐘辰發三界兮以覺其聾俾我羣動
兮不懼厥凶君子是象兮載鑠載鎔彌億斯年兮罔有天
鏞

滑州大廳銘

大廈中構，以屹飛鬪。黃河畎澮，大培塿整庶。宣風緝戎。

備寇鎮寧，一方光輔。元后

大照禪師塔銘

奘上人至傳諸大德，意令弟子撰和上碑。但重元門深闕。

四海大君者，我開元聖文神武皇帝之謂也。入佛之智赫。

為萬法宗主者，我禪門七葉大照和尚之謂也。是以從無。

因得不出三界於清泰運教，昭宣圓常，洽著菩薩之本心。

密住依國王之信力，口生於涅槃者，不其廣歟。和上諱普。

馮氏長樂信都人也其先畢公高之後畢萬入晉受
邑於魏支子食采馮城因而得姓洎亭爲韓上黨守在趙
爲華陵君異漢征西將軍思義晉駉騎將軍家於河南今
爲河東人也祖居士諱道相經德營道晦用藏密考居士
諱會均良背園廬飛遁鄉邑和上生而茂異長而開明神
清體閑氣和志遠枯樹雖小其根已深河源則微其流可
大欣願去結永言依僧嘗以德業書紳藝術從學負笈梁
許摠衣班馬博總經籍殫極天人以爲洪範九疇周易十
翼雖奧旨元邈然大畧迴疑不若別求法緣幽尋釋教時

大梁壁上人以義解方聞敷演雲會遂聽法華經唯識起
信等論巨石投水其入甚多修坂走丸所適彌遠重依東
都端和上受具轉奉南泉景和上習律超契心地忽見光
明隨止作行得親近處於是貞觀嵩阜隱居半巖布褐一
衣麻麥一食中夕歎曰文字是縛有無是邊盍不以正戒
爲牆智常爲座發廣大願修具足慈他方七寶之山路遠
難到自境四念之地身樂且安猶曰密印者謂之師先覺
者謂之達吾當求矣此其時哉將尋少林法如禪師米臻
止居已承往化追攀不及感絕無時芥子相投遇之莫遂

甘露一注受之何階翌日遠詣玉泉大通和上膜拜披露
涕祈咨稟良馬易進良田易平加之思修重之勤至寶鏡
磨拂萬象乃呈玉水清澄百丈皆見衡山之石更悟前身
新豐之家自然本處如此者五歲約令看思益次楞伽因
而告曰此兩部經禪學所宗要者且道尚祕密不應眩曜
和上旁求僻陋宛在園林夾江之間藜竹之下鮑蜃每作
虺蜮交馳頃差他人必辭痼疾和上願充僧使便得經行
心無所存背無所倚都忘禪睡了悟佛知兩馬一車進念
同轍一鳥二翼定慧皆空如此者復二年大通和上深賞

重之人未之蘭若今將自之大通止曰嵩山亦好至於再
諾而居焉長安年度編岳寺神龍歲請不哭泣而不言緇
素墜心棟梁落構以爲四害騰口誰者能緘五欲亂繩誰
者能截乃合謀悉意聞香求花如鳥隨風如輪隨跡咸請
和上一開法緣使四園可遊八池可浴則僧非聚食人異
散心願聞樂器之音用滋毛孔之潤和上曰夫淨燈可以
照勝宅助風可以持寶城今何爲乎且千車之聲不入於
耳萬人之請誰聽其言神龍中孝和皇帝詔曰大通禪師
降迹閻浮情存汲引戒珠圓澈流洞鑒於心臺定水方澄

結清虛於意府原其行也旣無人而無我測其理也亦非
斷而非常然而示彼同凡奄隨運往形雖已謝教乃恒傳
其弟子僧普寂夙參梵侶早筵法筵得彼髻珠獲茲心寶
但釋迦流通之分終寄於阿難禪師開示之門爰資於普
寂宜令統領徒眾宣揚教迹俾夫聾俗咸悟法音考功員
外郎武平一奉宣聖旨慰喻敦勸和上猶逡巡不獲
已仍曰廣大者莫極於虛空我性相能遍元妙者莫深於
開示我定慧能傳未或不從應身而建四生法主未或不
登正覺而啟一佛度門曷敢當仁以膺求我且正見了見

轉次旣殊浣家鍛家習一火別草席遇水而緊草繩遇水而舒地水火風青赤白黑八萬煩惱八萬解脫翳憍慢之山金椎難碎貪恚之毒龍珠不消諸生當誦戒經以傳正受開元十三年恩詔屈於敬愛寺宴坐逮十五年皇上將幸於京師也優詔曰慎言義福宜從駕和上留都興唐寺安置由是法雲遍雨在其根莖妙音盡聞惟所圍繞其始也攝心一處息慮萬緣或刹那便通或歲月漸證總明佛體曾是聞傳直指法身自然獲念滴水滿器履霜堅冰故能開方便門示直寶相入深固藏了清淨因耳目無根聲

色亡境三空圓啟一深洞明是故聞者斯來得者斯止自
南自北若天若人或宿將重臣或賢王愛主或地連金屋
或家蓄銅山皆轂擊肩摩陸聚水咽花蓋拂日玉帛盈庭
和上洗然若虛曠然若谷不見施者不知受焉遂龍象之
所崇惟塔廟之所供但趨猿自息醉象皆調聞是名者不
生四趣蒙其潤者便過四禪則有學富蓬山經通貝葉百
家奧旨三藏真言目如曜星舌如飛電莫不杜口折角失
容革心二十七年秋七月誨門人曰吾受託先師傳茲密
印遠自達摩菩薩導於可可進於璨璨鍾於信信傳於忍

忍授於大通大通貽於吾今七葉矣尸波羅密是汝之師
奢摩他門是汝依處當真說實行自證潛通不染爲解脫
之因無取爲涅槃之會諸生殊不知其故嗚呼八月二十
四日有彌留怡然坐滅於都興唐寺享壽八十九僧夏五
十二聞哀行哭臨堂撫膺雲霧冒山江河奔海沸渭全入
陰沈彌望者至於百萬皆曰天地德不踰晝水神明之祐
未際入流今之我聞異於汝說沐浴智慧之海超騰生死
之河恩崇化先痛深物表情可理割義可事詮者嘗以前
聖後賢示跡開教降生所以傳法歸盡所以同凡久留則

厭聞恐其慢易終去則追遠欲其懷思忘其身而神遷益
高間其法而事稀彌重始終權實之化不斷不絕究竟誘
進之益無去無來河南尹裴公名寬飛表上聞皇情震悼
詔曰大士遺榮豈貴於名稱前王表德必在於褒崇都同
德興唐寺故大德僧普寂資於粹靈是爲法器心源久寂
戒行彌高旣來理而悟空每導凡以宗聖慈悲所應汲引
蓋多方冀永年式宏像教遽從遷化用謝浮生言念於此
良深憫惜宜稽其淨行錫以嘉名示夫將來使高山仰止
可號大照禪師歸本居葬日量借威儀手力和上將變易

之歲累告門人曰吾久居山水緣亦在焉及泥日天竺興
唐緇侶皆請卜而厝之表而祈之唯岳寺一方地震雪下
少室羣巘樹折霜封洎九月八日恩私果令歸葬二十一
日金棺發軔鹵簿啟行或兩都傾城或四方布路持花者
林指執紼者景移三條之中泣淚如雨重城之外號叩若
雷綵雲二時自都達岳白露數里彌川遍空二十四日窅
於岳寺之舊居禮也門人等修羅死慈島人死義血現於
體繩繫於牀僉某拾衣一心起塔塵多折軸箭重迴舟銜
石而海水可填結竹而佛恩難報二十八載十一月十五

日恩旨許焉仍委寺主慧遠上座崇泰都維那曇慶等載
令構緝二十九年十一月十九日恩旨遷藏海寺於和上
河東舊宅廓爲寺焉建塔追崇福也且爰自六葉式崇一
門未誦戒經或傳法要大通以凡例起謗將棄我聞深解
依宗遠求聖道所以始於累土漸於層臺攝之孔多學者
彌廣故所付諸法不指一人卜夏西河有疑夫子鄭元北
海自襲馬融至於密意除知慧心入境如因日照方見日
輪終以佛光乃明佛道豈伊邕也而敢議之大弟子惠空
勝緣等相與追過去示方來一以抒宿心存妙用一以奉

慈訓宏教門騰淨行於松阡刻師資於石字其詞曰

三界渺茫四生沈痼塵境延歎蔭欲攻內明鏡虛受大慈

圓對法詰

反驚魔軍消潰

其

千佛轉覺七葉相承護持俗

諦應現真僧長河皎月靜室明燈梵經滋廣禪林蔚興

其二

童稚初心儒釋兼致梁陳咨稟伊洛勤匱雖臻闡域猶執

文字古城元遠空門深邃

其三

逝將分赴曾是幽求玉泉谷

口甘露山頭慧日一照浮雲四收給園都邑鷲嶺嵩邱

其四

大通往生後覺來問妙法終啟苦言未順願發他心稍宏

本分固讓固請不矜不訓

其五

德音光被皇華游臻曲荷天

舜昭宣法輪總總緇素憧憧搢紳以智慧水洗煩惱塵六其
慈攝雲奔檀施山積無相無願不受不斥龍象興補塔廟
光益香花戶庭護念泉石七其同人將滅依宗闡教草繫爾
師宴居爾照聞哀行哭惟艾及少命鳥無翼慈舟失棹其
渥恩痛悼追謚哀榮塔遂嵩岳儀從洛城靈輿顧步天樂
淒清追攀靈委感動雷驚九其入室來思登壇永慕密教不
紀後生何趣禮石塔兮若割仰金字兮如注杖億劫兮昭
陽與四法兮安住棋天寶元年二月十五日建

晴熱帖

三數日晴頓熱若爲自適也僕少二欲使小兒入京當從
澧州去有書不示之諸公歎賽無九百之事當不復爽也
故使馳問不具李邕白十二日差無多事檢校來一言集
耳通長孫五郎

藤偈

得彼柔性契茲佛乘豈無衆木我喻垂藤

國清寺碑并序

觀夫密教將開必有其地靈岳將應必降其人是以兆發
真僧功成宏願以一如正受之力致三朝大事之因故得

帝王宅心王公攝念國祥備至家寶薦臻玉宇懸空金谷
飛月婆若之海塵不能淄安明之山風不能振莫與京者
其在茲乎國清寺者隋開皇十八年智者大師之所建也
大師強植之根已於千萬佛所本性之照豈於一百年間
是以相眉雪光慈目水淨入不住地得無上緣五部律儀
具分金界三昧定力更立寶山始入天台居於佛隴則知
冥符事現元感名徵構室者不立於空託迹者必興於物
是寺本夏天台先是大師嘗夢定光禪師教曰寺若成國
必清大業元年僧智瓌啟其禪以爲號煬帝從而改焉至

義寧之初寺宇方就事屬皇運言符聖僧粵若右赤城左
滄海良背曾阜襟開平原寶勢雄侈於古今竒表巖淨於
江漢建置崇麗慮矩恢殊廣殿磴於重巖周廊廡於絕巘
峯臺納景於下視鴈塔排雲於中休八部來思不孤其德
三身在此有睟其容亦猶妙勝之鄉乾竺之里若即見佛
豈與登仙曷云菩提樹間必能七日成道忉利天上可以
三月安居而已哉借天仙往還神秀表裏靜漠漠而山遠
密微微而谷深自然羅浮遷移旣因風雨育王製造載役
鬼神落落然列星陳於九天昭昭然飛霞夾於二曜松間

豁達祥雲飛和雅之音橋路透迤德水照澄清之色什
者神奪散心者目明所以信士永言至人馳想不遠萬里
有以一臨離垢道場遇之即是去結法意願之便成淨水
寶珠見者無染高山甘露受者有知起念事功頓超十劫
之地坐入位證遙比千眼之天別有放生溪源通流朝信
鱗介千族壓海而隨波網罟萬艘因利而興簞崑崙之水
天地罕經通之極恒沙之命溪壑無醉飽之期大師憫其
殺因示其宿世父母妻子俱是輪迴山石地方盡歸報復
百味歡喜之藥願樂法王五指慈悲之根降伏師子由是

漁父易節鮮食向風釋綸解徽停篋去笥暢撥刺以掉尾
恣驗喁而鼓腮乘佛之威入佛之境不恐不懼且安且懷
矧過去之罔窮固未來之靡盡福德輕重等須彌之斤兩
濟度廣大同法界之範圍所以欽若九重煜燿萬國光贊
者五主襟絕者數朝儀鳳二年三月十日制曰台州國清
寺迺超塵俗年代或異妙相真容累呈感應之跡或淨居
仙宇函有徵祥之效大啟良緣實寄茲所宜今寺內各造
七級浮圖一所度僧七人自今有闕隨即簡補故其智
印接武草繫傳薪千葉蓮華了無異色五綵繒蓋休有圓

施物及僧唯吾與汝外物莫際密教自傳心淨色淨有邊
無邊持劔豈失喻筏能捐若遇諸佛已超四禪聞者斯來
見者斯說果果法似因因地岳心境始開知印皆發求仁
得仁即說非說沙彌救蟻菩薩放生溪流晝夜潮水虛盈
鱗介萬族濕化千名福河不絕佛土常寧郡邑才良紀綱
禪律恭惟令始雅尚休畢保綏地靈光照佛日將播美於
永代媿當仁於雄筆

葉有道碑并序

昔者誕發老君道純天地生德夫子身負日月且時宰不

宗主人勿用矧乎埋照浚谷潛盤窮山幽姿蛻於塵容素
尚允於仙類豈辟命行矣爵服繫之而已哉公諱國重字
雅鎮南陽葉縣人也自少典錫羨高辛纂緒陶唐重熙后
稷邁種文王之允乃食於沈尹戍之子載封於葉受氏享
國大哉邈乎逮祖乾昱克壯其猷永孚於德堉戶習隱塞
兌億坤碩膚長材通理博藝雖安車累至而堅卧固辭故
慶祚克開眉壽維永矣厥考道興性守公庭道敷邦國居
鬼從地率冲從天受籙以怛之飛符以比之扼魍魎之邪
劉臺台之崇有足竒也至於揮札落井引弓貫革特起五

光莫不清涼之泉沃茲劫燒定慧之力剗彼魔幢羅漢之
身時可去矣如來之室歲豈留乎昔有顛禪師者即大師
之復次也戒珠圓明德芽俊茂以精進大力運自在他心
每指堂東因如廁奄忽泉涌須臾石開雖炎赫曠時而清
冷彌載又堵波歲久根據勢危首亞西南趾留東北一遇
瀑雨稍浸廣庭護法陰隲而扶持信力潛運而平正宜其
女子不宿葷血不臻鎮之以法似守之以山神永懷水月
高謝風塵此又竒也於時明牧敬公名咸忠賢相門德禮
邦鎮宣慈被物遺直在人邑宰李公名安之不伎不求有

爲有守惠愛恤下貞固幹時大德行續上座神軌寺主道
翹都維那首那法師法忍等三歸法空一處心淨景式諸
子大濟羣生皆賞歎幽竒明徵相事雖衰回縱目而髣髴
畫屏豈曲盡於筆端固懸天深造以爲孫公之賦未究三
仙郭璞之經罕知十地是存刻石以廣披文其詞曰
兆出名山功加賢位脩甫和令茲焉感致佛隴通明國清
發瑞徵名立榜應運題寺法寺神麗像殿崇嚴九成臺閣
百丈松杉瞰瀛列座倚巘飛簷風庭蕭爽霧谷沈潛想像
梵宮超遙仙宇自有書傳耳無浪語不知從來相去幾許

部廣推大餘侯誰嗣哉先生靈承道宗異聞訓誘弱喪文
貌幼尚純篤仙骨有象童心不萌專精五龍遍遊羣岳聰
以知遠明以察微達死生之占體物氣之變嘗以靜貞動
耗息影歸止雲卧北壑林巢仙居人絕不鄰道阻且右獨
往幽勝永歌隱淪放閒保和習虛致靜拮五石之髓擷三
芝之英時哉不留歲聿其逝緇髮純漆韶顏渥丹事適元
同神與道媾惟寂惟冥不飲不食數十載於茲乃昇聞帝
庭駿發皇眷簡才受命降尊加禮將之以文馬速之以暢
轂先生盱眙長揖揮手高謝曰自昔帝舜登庸德輝允鑠

金定全唐文 卷之三十一
光武繼統吏道孔嘉且薛方逢萌備外臣之禮虞仲夷逸
終處子之業豈垢俗疵物偏貢介性將探道慕類坐致竒
齡使者蓄無言之疑申遂行之古乃周覽廬室躬省倉廩
考疇人之疆畝訊家童之作業皆儉以遵約安能維始味
不甘口色無養目信以爲著誠去僞敢守難奪順風可即
強起曷至焉遂虛覲復命慚歎聞列朝廷企其高渴其道
聆嘉聲而屬想者豈勝言哉有司以天元書缺星度官弛
亡五德之運謬四時之分荆鬼越祥不知所呪子亥母癸
烏識其原皆乘遠遠尋請益傳授可謂繩誠列而曲直微

衡誠懸而輕重立粵惟博物君子豈伊小說鯁生乎嗚呼
天不持久人將復歸頽年迫於期頤遠志屈於摧落卜兆
幽谷托墳清林逸人不追國士靡憲泉石沮色鄉縣失聲
豈無他人惟子之故允子慧明贈銀青光祿大夫歙州刺
史公罔替厥繇代增其業啟祕籙之高妙揚元津之洪波
道微若聲心麼若氣吹律煖谷運歷知天屢下辟書終不
應命孫子景龍觀道士鴻臚卿越國公法善幼得父書早
傳成法夤念有訓邁迹自身讀天下之書備方外之術火
滌淫祀劔誅羣祆恩開五君名動四國其入也掛金瑣謁

紫庭爲帝傲吏其出也法玉京坐元寺作人宗師故能大
匠道門冢卿朝右禮食軒座寓直禁廬矣嘗以理氣自強
登老益壯雖莫景急節而純孝孔哀是獻封章願拜墳墓
有軫帝念載形王言神札以飛傳瑞乃發羣公帳餞列蕃
郊迎朝章有輝鄉人皆慶枉以末技揚於孝心惟先志以
追遠立豐碑以紀德夫何閒然其詞曰

宗門素履家代隱仙道一相孕薪火相傳黃公術在赤水
珠聯道開幽鍵性與真筌一門累祖四世百年抗迹巖谷
消聲大地卓爾遐舉藹然高致麝以臭焚珠以明墜人則

有心徵亦不至保身匪媮全樸爲利孝孫增業明辟順風
志嘗無忝事或不同徵賢朝滿舉逸山空曷由高枕克謝
代工測微達變盡規納忠皇眷雖渥孝思亦深章服粲粲
傳駟駸駸載違廷闕是展墳林紀石追遠昭銘率心孝終
事立榮歿寵今遐超古始永憲江南

秦望山法華寺碑并序

昔者法王道開掘山相現曾是大事職非小
證入彌遠故以三界爲宅五濁爲火四生爲丁六度爲門
一乘爲大車十方爲長者轉置熱惱之眾延集清涼之都

念茲在茲廣矣大矣法華者晉義熙十二年釋曇翼法師之所建也師初依廬山遠公後詣關中羅什深入禪慧尤邃佛乘雖禮數摳衣而名稱分坐與沙門曇學俱遊會稽觀秦望西北山其峯五蓮其溪雙帶氣象靈勝林壑虛閑比興者閣營卜蘭若羞涅槃食納如來衣專積法華永言實意感普賢菩薩爲下俚優婆提狶子於竹筐寄釋種於蓬室師以縮屋未可枕屐乃明移出樹間延入舍下及杲日初上相光忽臨乘六牙衛八部勝幡虹引妙樂天迎瑞相騰雲遙裔上漢師想望太息沈吟永懷葉公好龍已遇

真物羅漢測佛未了聖心於是苦行自身炯戒通夢宛如
昔見彌恨前非象勸持經嘗難其語夾夾聽法不易其人
矧乃攝以蜂王吼以師子禮謁者倚其裳袂讚歡者合其
風雷時太守孟顛以狀奏聞以爲寺則知妙法者真如之
正體蓮華者淨道之假名是故崇厥經署於榜入無量義
成不住因至若高僧慧基邑人陳載皆踵武扳跡傳燈襲
明或五柱範堂或七寶規殿立普賢座追連弗藍龍王讓
池鴈子疏塔迦羅衛國連至雲山淨明德宮更開日月固
足以發慧印啟元門入位畢臻出家偕應則有持證等觀

永藏全流或慧舉十徵或昭明再造或簡文瑞像或武帝

香鑪寶鈴吟風珠幡交露僧繇墨意畫長豪之妙光宮女

縱功織大身之變相次有陳隨國施州邑吏檀百寶盈於

九隅羣經備於三藏所以神鍾警夜保賢聖之天居祥鳥

肅賓迂軒蓋之雲集忍辱靈草据萋萋於小莖偃曇異花

寧灼灼於喬榦故得人天迴首江海因聲芭蕉過雷倏焉

滋茂葵藿隨日至矣勤誠登山而野曠心空浴水而垢除

意淨施及先律師道岸今弟子釋儼並身林久伐禪刺都

遣性通美事戒總八關金杖五分優劣既等繒綵四道功

德豈殊甘露有加香油不墜頃者豪州刺史前此邦別乘
太原王公名弼法海廣大慧炬融明德立於衷義聞於物
郅憚致主之節有耿投竿葛亮報國之誠不忘草奏夫人
武氏佩服真空干櫓正覺及男緬緒等惟肖二尊克慎三
業若行若坐依佛依僧去煩惱之外糠得慈悲之內實起
普賢臺一級寫法華經千部廣化人吏大啟津途即普賢
臺立法華社每年二月重會一時且地效其靈山呈其秀
有上座正覺寺主道解都維那神慧僧表道賓律師行深
慧燈集眾材爲林眾器成樂一體和合互用住持相與王

公曰夫名者事之華碑者物之表其或表不立則瞻仰失容名不興則讚述無地願言刻石是用齊山朝散大夫前侍御史今都府戶曹袁公名楚客其皎如日其心如丹負兼濟之雄才託演成之雅意顧慙作者徒使懵然其辭曰會計南山秦望北寺高僧往還聖跡標寄耆闍比峯法華取義羣公護持厯國檀施陸寶大來海珍總萃幡影連珠像光發瑞臺壓龍首殿開鳥翅象駕菩薩烏迎車騎異香馥醇神鍾髣髴松巘蕭疎竹澗蔥翠網紀有條禪律不墜掾曹正直別乘仁智作爲碑板讚述名字

兗州曲阜縣孔子廟碑并序

嘗觀元化陰藏上帝元造雖道遠不際而運行有符揚推
大抵宣考神用建人統之可復補天秩之將頽其揆一也
昔者蚩尤活賊厥弟驕兵巨力朋徒合緒連禍則黃帝興
聖首出羣龍推下濟以君人微勤畧以戡亂逮至橫流方
割包山其咨轉死爲魚鱸食不粒則堯禹並跡扶振隱憂
導百川康四國粵若殷禮缺周德微宋公用郟楚子問鼎
則夫子卓立燦然成章闢邦家之正門播今昔之彝憲此
天所以不言而成化聖所以有開而必先其若是也故夫

子之道消息乎兩儀夫子之德經營乎三代豈徒小說蓋有異聞夫亭之者莫如天藉之者莫如地教之者莫如夫子且沐其亭而不識其道則不如勿生荷其藉而不由其德則不如勿運故曰消息乎兩儀者也夫博之者莫如文約之者莫如禮行之者莫如夫子且會其文而不揚其業則不如勿傳經其禮而不啟其致則不如勿學上代有以焯序中代有以宗師後代有以丕訓故曰經營乎三代者也噫唐虞之美不必至是讚而大者進聖君也夏桀之惡不必至是擠而毀者激庸主也伊尹之忠不必至是演而

數者勉誠節也趙盾之逆不必至是抑而書者誅賊臣也
至若論慈廣孝輔仁寵義職此之由於是君臣之位序父
子之道明朋友之事與夫婦之倫得雖朗日開覺膏雨潤
黷和風清扇安足喻哉借如九皇繼統而政醇七聖同年
而道合雖事業廣運而理濟一時未有薄遊大夫僻居下
國德敷既往言滿方來廟食列邦不假手於後續君長萬
葉必歸心於素王若此之盛是以騰跨百辟孤絕一人曷
成名可稱取興爲大者已我國家儒教浹宇文思戾天伸
吏曹以追尊建禮官而崇祀侯褒聖於人爵尸奠享於國

庠是用大起學流錫類孝行敦悅施於萬國光覆彌於允
 宗三十五代孫嗣襄聖侯璿之字藏暉泊族賢元亨等或
 專門碩儒罔墜於緒或餘波明哲克揚厥聲乃相與合而
 謀曰夫墟墓之地禮曰自哀聽頌之樹詩云勿翦一則遇
 事遺愛一則感物允懷矧乎大聖烈風吾祖鴻美故國封
 井舊居川岳歟宜其悚神馳魄膝行膜拜陳齋祭奠嚴祠
 樹繚垣以設防刊豐石以為表兗州牧京兆韋君元珪字
 闕二
 字 王國周親人才懿德明啟風績休有名教長史河南
 源晉賓字光國賢操孤興清節相遠納人以禮成俗於師

司馬天水狄光昭字子亮相門克開雅道踵武聞義必立
從事可行錄事參軍東海徐仲連功曹成陽蓋寡疑倉曹
太原王道淳宏農楊萬石戶曹博陵崔少連宏農楊履元
兵曹太原王光超范陽張博望法曹安定皇甫恮東海于
光彥士曹滎陽鄭璋參軍事博陵崔調扶風竇光訓河東
裴璿隴西李紹烈闕四儀傳闕一南陽樊利貞曲阜縣令
鴈門田思昭丞河間劉思廉主簿吳興施文討清河晏宏
楷等官序通德儒林秀士升堂覩奧遊聖欽風僉同演成
乃共經始其辭曰

元天陰騭大明虛鏡神不利淫物將與正凡曰投艱在此
逢聖吞沙薦虐軒黃底定襄陵兆災夏禹文命周道失序
夫子應聘刪詩述史盛禮張樂雅頌穆清訓詞昭灼片言
一字勸善懲惡誘進後人啟明先覺六順勃興四維偕作
元功濟古至道納來首出列聖席卷羣才大名震耀廣學
天開蒸嘗匝寓誦習窮垓帝念居室以光壽宮建侯於嗣
環封厥中孫謀不泯祖德斯崇乃刊聖烈克廣休風

欽定全唐文卷二百六十三目錄

李邕三

楚州淮陰縣婆羅樹碑

鄭州大雲寺碑

嶽麓寺碑

靈巖寺碑 并序

大唐泗州臨淮縣普光王寺碑

嵩岳寺碑

大相國寺碑

大毘盧遮那菩薩摩訶薩經

高岳寺經

大智度論卷之九十四

靈藏寺經

燈錄寺經

大雲寺經

佛所說經

李昌

欽定四庫全書文卷二百六十三目錄

欽定全唐文卷二百六十三

李邕 三

楚州淮陰縣婆羅樹碑

觀厥好德存樹愛人乃
 有情不忘雖小可作夫施及者
 也則有宗廟加敬墟
 覩物可懷比事斯廣此觸類
 者也矧乃通感靈變元符聖迹根柢淨土碩茂佛時燭金
 山之秘影聯玉毫之殊相至若泥日法會茶毗應身妙有
 雙樹之閒光覆僧祇之眾安可混曜散木比列清林議上
 茅之挺生喻堅固之神造者也婆羅樹者非中夏物土所

宜有者已婆娑十畝映蔚千人密幄足以綴飛颺高蓋足以却流景惡禽翔而不集好鳥止而不巢有以多矣然深識者雖徘徊仰止而莫知冥植博物者雖沉吟稱引而莫辨嘉名華葉自奇榮枯嘗異隨所方面頗徵靈應東瘁則青郊苦而歲不稔西茂則白藏泰而秋有成惟南匪他自北常爾或季春肇發或仲夏萌生早先豐隨晚暮儉若且槁莖後吐芬條前秀差池旬日奄忽齊同無今昔可殊非物理所測古老多怪時俗每驚巫者占於鬼謀議者惑於神樹證聖載有三藏義淨還自西域逮茲中休信宿因依

齊戒瞻嘆演夫本處徵之舊聞原其始也榮灼道成之際
究其來也摧藏薪盡之餘或森列四方或合并二體常青
不壞應現分榮變白有終示滅同盡昔與釋迦蔭首今爲
羣生立緣夫佛病從人大慈感故樹萎因物深悲理然化
能分身半枯卽是心有合栢後茂還齊宜其表正聖神靈
貺品彙以變見一攝而稱讚十方者也淮陰縣者江海通
津淮楚巨防彌越走蜀會閩驛吳七發枚乘之邱三傑楚
王之窟勝引飛轡商旅接艦每至同雲冒山終風振壑宦
子惕息槁工疲懷魚貫迤其萬艘霧集山於層渚莫不膜

拜圍繞焚香護持復悔多尤迴祈景福於是風水相借物
色同和挂帆啟行方舳駿邁浮山掘起而疏巘慶雲亂飛
而比峯雖電影施鞭夸父杖策罔可喻其神速曷云狀其
豁快者哉州牧宗子名仲康廣孝惟家大忠形國播清政
以主郡儀古式以在人微知彰有禮有樂別駕扶風竇
公名誠盈盛門貴仕德令名利用以厚生明畧以營道
上交不諂下交不黷司馬宗子名景虛受賢交幹用柔克
退遂中律先後自公且觀麟定之詩未宏驥子之任邑宰
清和張公名松質藐自稚節忽乎博聞始於能賦而彰中

於成器而立牧人通急徇物合權威肅攝於神明慈惠安
其父母豈伊政理自有才名莫不淨慮一乘追攀八樹歎
徙植而多感惟化生而永懷大啟上緣率心檀施碩德道
暉寺主道元上座道絢都維那曇一等皆妙覺圓常什門
上首痛金棺而既往駭堅林而在茲鄉望司徒元簡戴元
景王元珪張仁藝王懷儼劉元隱沈信詳等夙悟大師深
入真際勤行進力護供莊嚴揚州東大雲寺法師希元廣
派法流固祗德本戒行有以鎮浮俗利言有以誨蒙求旣
憑藉於衆心亦謀明於獨得是標靈跡乃建豐碑其詞曰

政化之理兮甘棠猶存寶乘之妙兮婆羅是敦欽厥道成
兮八相克尊感乎示跡兮一歸可門與佛合緣兮榮落同
時歟爾化生兮感變誰思休徵咎徵兮伺察不欺流俗莫
識兮繇曠驚疑上人西還兮觀止增悲發皇靈應兮堅固
在茲方國傳聞兮想象悽其回首正信兮頂禮護持優曇
千年兮曷足議之

鄭州大雲寺碑

恭惟黃屋者異唐堯之大雅精舍者曷釋迦之廣乘將
示崇高宏誘進俾夫壯麗加於四海瞻仰攝於羣情酌言

永圖卽理一貫矣大雲寺者鄭國慈緣之所建也觀其肇
允枚卜爰適底居所感彌多光靈滋茂固以星晷上憲人
統下稽執天物之大中合元宮之妙相豈止宅豐壤盤石
川厦屋雲陰沙門玉立而已於是象設巨麗法供魁殊尊
容乃神靈眷所仗則有寶座蓮動現身金光不同於凡復
歸於靜至使彌留咸華遠人孔殷香饌比肩花蓋擊轂一
心不起則從願應如二見無物則隨施逾疾故能飛名勝
出福履嘉祥昭升累朝發宏厯聖粵我高祖神堯皇帝俟
時登庸從觀與感再駕尚軻五轉欲承鳳難疑喬雲龍睇

霄極馳睿想於幽贊禱法力於大雄創建漆象一軀植淨
根也洎我高宗天皇大帝纘祖匡業繼明德輝萬流澄瀛
八風叶律齊致功於化造將有事於岱宗道由是邦言念
茲者寺中留綉像一幀實也丁厥則天皇太后奉遺託孤
與權改物母儀霸迹闡政神器追惟乾蔭永動皇情明啟
度門宣遊覺路乃降綉像一鋪廣也借如崇建塔宇附麗
朝闕憑縣官之力散王府之財中使相望匠人經始則有
之矣未或介在草澤僻居里閭發皇明光甲落寵錫於
天上有如此之盛者也日者通莊載堙繚垣式遏門途弗

敞面勢匪宏浮雲在天蝦蟆蝕月具瞻者渴高明之歎歸
止者憤翳鬱之心寺主俗姓李氏名婆諦隴西姑臧人也
發趣如因彌入禪寂雖獨得斷相而同人有爲乃陳詣府
庭移牒省闈引仍舊之直矯易恒之枉申報曠祀奔走宣
勞終於訟貞成我道勝是以頽牆堙塹焚萊平場廣途褰
開曾構踴出巖若當場豁若捷徑洛師之道盪曾泠然決
渠滎波之水所謂形便得裝嚴具行李榮觀郡邑景矣長
史河東柳沖府君道融至和性與元德從心絲譜遊刃翰
林推轂演成誓言同事是刊厥懿豈伐於功其詞曰

鄭之法宇兮在城一隅大雄應感兮休徵有殊累聖克念
兮象設三鋪佛身圓對兮神光發圖乃奉靈勝兮至白彼
都面勢推隔兮頽垣朽株南望不及兮鬱然坐拘觀者佇
眙兮願履夷途碩德感發兮執心匪渝豈用厯紀兮茲事
乃敷刻石傳懿兮表此亨衢

嶽麓寺碑

夫天之道也東仁而首西義而成故清泰所居指於成事
者已地之德也川浮而動岳鎮而安故耆闈以居取於安
定者已茲寺大抵厥旨元同是以迴向度門纏於郭右仰

止淨域列乎巖巔寶堂岌業於太虛道樹森梢於曾堵無
風而林壑肅穆不月而相事澄明化城而真梵天猶俗名
稱殆絕地位嘗高者不其盛歟麓山寺者晉太始四年之
所立也有若法崇禪師者振錫江左除結澗陰嘗與炎漢
太宗長沙清廟棟宇接近雲霧晦冥赤豹文狸棟蘿薜帶
山祇見於法服竇后依於佛光至請舊居特爲新寺禪師
洎翼日宏聚謀介衆表之明詔行矣水臬有制邱墟盡平
太康二載有若法導禪師者莫知何許人也默受智印深
入證源不壞外緣而見心本無作真性而注福河大起前

功重啟靈應神僧銀色化身丈餘指定全摸標建方面法
物增備檀供益崇廣以凌雲之臺疏以布金之地有若法
愍禪師者江夏人也空慧雙銓寂用同轡慈目相視淨心
相續綜覈萬法安住一歸注大道經究上乘理永託茲嶺
克終厥生逮宋元徽中尚書令湘州刺史王公諱僧虔右
軍之孫也信尚敬田作爲塔廟追存實相加名寶山斂乎
弓冶筆精陶甄意匠留書藏石緘妙俟時候法宇之傾低
斯珍價以興葺遠慮將久遺事未彰梁天監二年刺史夏
侯公諱祥了義重元別構正殿紹泰二年刺史王公諱琳

律師法賢或在家出家或聞見眼見建涅槃像開甘露門
長沙內史蕭沆振起法鼓宏演梵言繼捷槌於景鍾納貝
葉於層閣陳司空吳明徹隋侍中鎮南晉安王樂陽王並
佛性森然國楨秀者壯迴廊以雲構蔚聯居以天覆開元
九年天台大禪師守護法身澄清悲海嚴幢標聳智火融
明襲如來堂坐法華定四行樂而不取三賢登而更遷有
若曇捷法師者伐林及樹染法與衣不墜一滴之油有露
大根之雨總管大將軍齊郡公權公諱武福德莊嚴喜慧
方便疏寫四部鎮重百城有若智謙法師者願廣於天心

細於氣誦習山頂創立花臺有若摩訶衍禪師者五力圓常四無清淨以因因而入果果以滅滅而會如如有若首

楞法師者文史早通道釋後得遠涉吳會幽尋天台法界

圖於剡中真訣論於湘上具究竟戒敷解說筵一法開無

量之門一音警無邊之眾方等有以復悔雙林有以追遠

並建場所互為住持惟

闕字

一禪師者迹其至憑其高起乎

雲門絕彼塵網深以為性有習道有因止於心返於照習

也者坐乎樹居乎山因也者固習而無因則不佳因而無

習則不證是以區和正覺阿若冥搜想息而精進甲堅愛

除而煩惱殼散百川到海同味相鹹千葉在蓮比色於淨
起定不離於平等發慧但及於慈悲故能聞者順其風觀
者操其道牧伯萃止皇華游臻啟焚香之上緣託神佛之
嘉願上座惠杲寺主惠亶都維那興哲等皆靜慮演成妙
輪轉次因差別而非法隨品類而得根去二見而入流率
一心而辦事咸以形勝之會如彼修行之迹如此而豐碑
未勒盛業不書安可默而已哉將何以發揮頌聲披揚宿
志者也司馬西河竇公名彥澄碩德高闡紹賢遠識器守
岳厚撫操冰清屬以師長闕官攝行隨手以家而形於孝

友以已而廣於詩書以重而雅俗自興以明而至道不若
且猶歸心淨土模範佛乘摧憍慢之外幢與開示之真語
建謀羣吏乃命下寮顧蛟山之易疲歎龍宮之難紀其詞

曰

天地有象聖賢建極宴坐中巖成道西域後代襲武前良

作則安樂是依靈鷲是式一想冥契二歸願塞其一金方置

廟衡麓開場龍象擁錫人天護香思神賜土靈化度堂重

鎮牧伯上游侯王光昭法侶大啟禪房其二幽谷左豁崇山

右峙瞰郭萬家帶江千里玉水布飛石林雲起雷激庭際

月窺窗裏花臺隨足天樂盈耳其人與地靈心將法滅既

往在此比明齊哲佛日環照牛車結轍連率順風駟驪欽

烈訪道追勝形馳目絕其四碑板莫建軌物未宏和合是請

佐貳是膺政敷大郡信發廣乘願言有述以訪無能惟石

可久與山不崩其五

靈巖寺碑 并序

靈昌郡太守邕以法有因福闕二得真僧戾止神人告祥

宜或真空以悟聖或密闕一以接凡闕一謂之靈巖允矣

真晉宋之際有法定禪師者景城郡人也嘗行蘭若若若

者歷年禪師闕一字 勞一人逝將辭去忽有二居士字 僧

坊宏宣佛法識者以為山神耳因夫山者土之至厚谷者

墟之至深水者因定而清林貝葉之經衡廓蓮花之獨人

存法立事著名揚空矧乎辟支佛牙灰骨起塔海龍王意

賀金仍舊昔者州將厚具邑吏孔威廣闕一字 支保多借器

物而送之仍施絹五十匹闕一字 若武闕一字 阿閣儀鳳堵波

光堂大悲之脩舍利之闕二字 身之造禪祖之崇山闕二字 增

闕四字 也雲霞炳煥於丹霄即而察之日月照明闕三字 二闕

字 客植之不生汎於草間穢於壠上職由律住持入慧之

境闕一繁文字闕一筆杪於連章闕一廣門遺刻上座僧

元景都維那僧闕一祥闕一主安禪或上首闕一空或出

等永言悟入大啟津梁咸高梯有闕一勝公自照仍依俗

諦天長其詞曰

倬彼上人巍乎曾嶺冥立福地神宮歲時建置今古齊同

磴道邈迤霞閣聆矚其二岳寺台之國闕一岱之北阜蒲之

要徑是人依法闕一事聯聲哉傳覺以極斯萬其五

大唐泗州臨淮縣普光王寺碑

噫代人以塔廟者即有象也儀像者非有相也邕嘗論之

未始諒矣其或執之於我安住爲十劫之場釋之於空循
捨得一如之智皆所以頌其願酌其心必於無作之時敷
宏正法之故俾或禮或見能超因因之緣若我若人盡登
果果之業則曷爲不應曷道不行豈空寂之門獨階證入
事相之地遂阻圓明者哉普光王寺者僧伽和尚之所經
始焉和尚之姓何何國人得眼入地龍朔初忽乎西來飄
然東化獨步三界遍遊十方烏飛於空月見於水泥鍵鐵
鎖降伏貢高長者錦書散除文字深以愆爲苦器道實法
鈞消一無於太常越諸有於實際豈徒福河灌頂慈雲覆

身舉于而安喻四因動足而興復三見或以沉香作炭有
枉言者則誘而進之沙末求珠不知其量也則呵而責之
杳象之行雖極水底神龜之出亦兼陸道因如法如自得
定力有作無作冀是福田嘗縱觀臨淮發念置寺以慈悲
眼目信義方寸興廣濟心儀普照佛光相纒現瞻仰已多
遠近簪裾往來舟楫一歸聖像再謁真僧作禮祈祥焚香
拔苦觸塵者庇如來之影牽毛者荷師子之威信施駢羅
建置周布繚垣雲矗正殿霞開層樓敞其三門飛閣通其
兩鋪舍利之塔七寶齊山淨土之堂三光奪景於製造也

未綴於手猗德名也已聞於天中宗孝和皇帝遠降綸誥
特加禮數延入別殿近益重元德水五瓶霑濡紫極甘露
一斗福潤蒼生乃請寺名仍依佛號中宗皇帝以照言犯
諱光字從權親覩御書寵題寶額垂露落於天上飛翰傳
於國中其來也廣內慶齊其至也連城歡迓扇憑筆貴獨
屬右軍寺爲額高更因天子每名晨大眾瞻禮嬉遊上昇
門臺直視川墅巒阜噫嶙而屏合淮水逶迤而帶長邑屋
助其雄商旅增其大茲爲勝也曷以加焉和尚口雖勿稱
緣乃有以知變易之道迴軒少留衆生可悲菩薩亦病示

滅同盡唯識永存嗚呼以景龍四年三月二日端坐棄代
於京薦福寺跡也孝和皇帝申弟子之禮悼大師之情敬
漆色身謹將法供仍造福度門人七僧賜絹三百匹勅有
司造靈輿給傳遞百官四部哀送國門以五日還至本處
當是時也佛像流汗風雨變容鳥悲於林獸號於野矧伊
慈子降及路人乎過去僧惠嚴等主僧道堅弟子木義等
並持床有義失劍無追施法立齋知時明物罔墜舊業克
嗣前修攀係儀形建崇塔院植婆羅樹表蓮花臺宛然坐
而不言歟爾感而皆應懺則殃滅求則福生雖日月已綿

而靈變如在歸依有眾檀施孔多鯨鍾萬斤震覺六種講
筵七架開導四生清淨之身更疏俗室涅槃之飯別構食
堂可謂能事畢矣喜願并矣宜八部之宅以致諸天迴首
自然樹懸密語印文地現五風轉柔澗之音千燈焰光明
之色構之者罪花彫落信之者焦種萌生雷嚮發其六牙
珠彩澄其二水州牧杜公惟孝其直如箭其潔如水地壓
淮上城遷泗中民勦於勞物集其利長史宗公司馬盧公
或清節自公文雅形國或禮容虛已堅操動時臨淮宰薛
欽行等或主諾條流庭無置對或子人簡德邑有歡康並

堅位大車正信超士興二道之教發一師之因相與累贊
經身長懸覺道樹不朽之德宏未來之功是刻豐碑以光
盛美其詞曰

惟普照之大身分杖菩薩之右臂粵靈瑞之可聞兮固昭
成之難值期一會之來思鳩萬輩之善施宏住持之信受
廣事相之該備豁川陸之雲龍雄城邑之頽雉辟天師於
九重補人王於十刹嘉寺榜之立名寵聖札之題字追已
滅之化身了見在之文義貯儀形於空塔存詞謁於金地
咎無憾而不除福何求而不致副真僧之貞寶接羣公之

雅器播永日於山河刻巨石於淮泗

嵩岳寺碑

凡人以塔廟者敬田也執於有爲禪寂者慧門也得於無
物今之作者居然異乎至若智常不生妙用不動心滅法
滅性空色空喻是化城竟非住處所以平等之觀一洗於
有無自在之心大通於權實導師假其方便法雨任其根
莖流水盡納於海壖聚沙俱成於佛道大矣廣矣不可得
而談也嵩岳寺者後魏孝明帝之離宮也正光元年榜閑
居寺廣大佛刹殫極國財濟濟僧徒彌七百眾落落堂宇

踰一千間藩戚近臣逝將依止碩德圓戒作爲宗師及後
周不祥正法無緒宣皇悔禍道叶中興明詔兩京光復二
所議以此寺爲觀古塔爲圻八部扶持一時靈變物將未
可事故獲全隋開皇五年隸僧三百人仁壽一載改題嵩
岳寺又度僧一百五十人逮豺狼恣睢龍象凋落天宮墜
構劫火潛燒唯寺主明藏等八人莫敢爲尸不暇匡補且
王充西拒蟻聚洛師文武東遷鳳翔巖邑夙承羽檄先應
義旗輓粟供軍悉心事主及傅奕進計以元嵩爲師凡曰
僧坊盡爲除削獨茲寶地尤見褒崇實典殊科明勅洊及

不依廢省有錄勲庸特賜田碾四所代有都維那惠果等
勤宣法要大壯經行追思前人髣髴舊貫十五層塔者後
魏之所立也發地四鋪而聳陵空八相而圓方丈十二戶
牖數百加之六代禪祖同示法牙重寶妙莊就成偉麗豈
徒帝力固以化開其東七佛殿者亦曩時之鳳陽殿也其
西定光佛堂者瑞像之戾止昔有石像故現應身浮於河
達於洛離京轂也萬輩延請天柱不迴惟此寺也一僧香
花日輪俄轉其南古塔者隋仁壽二年置舍利於羣岳以
撫天下茲爲極焉其始也亭亭孤興規制一絕今茲也巖

巖對出形影雙美後有無量壽殿者諸師禮懺誦念之場也則天太后護送鎮國金銅像置焉今知福利所資演成其廣珠幡寶帳當陽之鋪有三金絡花鬘備物之儀不一皆光滿秋月色陵渥丹窮海縣之國工得天人之神妙道遙樓者魏主之所構也引流插竹上激登樓菱鏡漾於玉池金虬飛於布水食堂前古鐵鐘者重千斤函二十石正光年中寺僧之所造也昔兵戎孔殷寇攘偕作私邑竊而爲寶公府論而仇後有都維那惠登發夕通夢明獨往以一己之力抗分衆之徒轉戰而行踰晷而至雖神靈

役鬼風雨移山莫之捷也西方禪院者魏八極殿之餘趾也時有遠禪師坐必居山行不出俗四國是仰百福攸歸明準帝庸光啟象設南有輔山者古之靈臺也中宗皇帝詔於其頂追爲大通秀禪師造十三級浮圖及靈廟極地之峻因山之雄華夷聞傳時序瞻仰每至獻春仲月諱日齋辰鴈陣長空雲臨層嶺委鬱貞柏掩映天榆迢進寶階騰乘星閣作禮者便登師子圍遶者更攝蜂王其所由焉所以然矣若不以達摩菩薩傳法於可可付於璨璨受於信信恣於忍忍遺於秀秀鍾於今和上寂皆宴

坐林間福潤寓內其枕倚也陰阻

四岳之宗其津

梁也密意所傳稱十方之首莫不

記法中出家湛

然觀心了然見性學無學自有證

清淨開

頓漸者欲依其根設戒律者將攝乎亂然後微少之義深入一如廣大之功遍滿三界則知和雅所訓皆荷法乘慈悲所加盡爲佛子是以無言之教響之若山不舍之檀列之如市則有和上姪寺主堅意者憑信之力統僧之綱崇現前之因鳩最後之施
上座崇泰都維那曇慶等至矣廣矣經之營之身曰
福河流注今昔紛擾雜事夥

多是以功累四朝法崇七代感化可以函靈應緣起所以
廣元河故得尊容赫曦光聯日月厦屋宏敞勢蹙山川迴
向有足度四生鎮重有足安萬國豈伊一邱一壑之異一
水一石之奇禪林玲瓏會深隱見祥河皎潔丹雘澄明而
已哉咸以爲表於代者業以成形藏於密者法亦無相非
文曷以陳大畧非石曷以示將來乃命道奐禪師千里求
蒙一言書事專精每極臨紙屢空媿迷津之未悟期法主
之可通其詞曰

西域傳耑闍山世尊成道於其間南部洲嵩岳寺達摩傳

法於茲地天之柱帝之宮赫奕奕兮飛九空禪之門覺之
徑密微微兮通眾聖鎮四國定有力開十方慧有光立豐
碑之隱隱表大福之穰穰

大相國寺碑

夫聖不徒作作必有因化不徒開開必有攝故大事所會
一法所傳若天若人或賢或達雖萬牙出地而三獸渡河
使不聞者聞未悟者悟豈虛也哉此寺伽藍古廢建國有
濮州之像自安業而來及逝將復歸堅守常住人至萬且
千飛聲若雷用壯敵國坐如清泰安如須彌有若部人郭

賓者生心起謗雙目失明有若部人陳振者興言誑徒喉
腫及舌皆追悔自昔瘞平在今或沒身爲奴或鑄鐘依佛
延和初載奉詔改爲大相國寺復置額焉先天中內府降
財御書題額睿宗通夢靈應肇發臨遣額得僧真諦載馳
載驅乃慰乃止昭宣渥命寵錫神幡吏人候迎法侶圍繞
豁塵里羅郊原者不可勝計夫以金仙聖容之表先主感
之伐邠嘉名之舊先主標之筆精池水之妙先主躬之故
能鍾乾坤激日月景光遐燭德寓宏覆曷云比也我開元
神武皇帝受天元禧祚國傳寶睦九族叶萬邦功濟而業

成道光而孝理惠康父子義結華戎寰瀛之濱大輿之上
禺禺而戴欣欣而懷逮識路於茲寓目於茲者莫不瞻大
明欽聖札仰天性而泣遺澤荷慈民而歎堅林形力者罔
告勞檀施者罔辭費莊嚴不獨於示相功德何止於無爲
碁布黃金圖擬碧絡雲廓八景雨散四花國土威神塔廟
崇麗此其極也雖五香紫府大息芳馨千燈赤城永懷照
灼人間天上物外異鄉固可得而言也上座知隱寺主元
深都維那上智儼皆妙覺圓常對境亡境彌入後地因如
得如合之不離混以相以爲他方所至廣法界惟三

虛空所至宏度門惟一沉乎實相感通之應聖跡飛動之
 神安可默頌聲闕題紀者已乃作頌曰
 佛法住持正教宏益真容見寺先帝書額藩邸鴻名建國
 前跡我皇孝理我人光澤日月明明家邦赫赫觀妙追遠
 懷恩惟昔八部莊嚴四天感激以式永代是紀豐石

寺幾暨於春國輔光其赫不歸於天而歸於上太極
 得幾望下仰天封而立真聖林漢月而煥聖林沃以首
 萬萬而萬萬而刻刻而刻刻刻刻刻刻刻刻刻刻刻
 刻刻刻刻刻刻刻刻刻刻刻刻刻刻刻刻刻刻刻刻

欽定全唐文卷二百六十四目錄

李邕四

海州大雲寺禪院碑

東林寺碑并序

五臺山清涼寺碑

大唐贈歙州刺史葉公神道碑

贈安州都督王仁忠神道碑

長安縣尉贈隴州刺史王府君神道碑

唐贈太子少保劉知柔神道碑

魯頌天子少昊

具安

韻文

大猷

五臺山

東林寺

真武大帝

李

增定全唐文卷三百六十四目錄

欽定全唐文卷二百六十四

李邕四

海州大雲寺禪院碑

天也地也攝生之謂元造日也月也容光之謂神功然亭
育之仁可幹終滅照明之力未焯昏霾故熱惱積薪劫燒
難鑠驚波巨海沃焦自淵獨有導師空王禪那宴寂一念
首安住之域加行證無爲之階密教內修莊嚴外度雙引
相應並照兩忘然後生無生淨名不去照無照了義能覺
熬菩提之炬則枳棘滌除楫般若之航則橫流旣濟湛四

禪於中道超三有以上征精舍攸躋度門斯盛其此之謂
矣粵有寺之艮背山之前臨有確師禪房者武德八年邦
守蕭公諱顓護法之所建也周目環郭澄心際海亦旣一
味實無衆生夫憑其高宅其勝曾近俗諦或乘法流且水
出於冰凡作於聖雖曰醜地猶是道場矧乃妙有孤標寶
相靈變入我室觀我形者哉施及貞觀歲有等觀禪師繼
前心承後問分之則別位二事合之則同列大空坐於斯
竟於斯於戲四益風驅百爲火滅棟宇崩落象設傾低先
天中有惠藏禪師聞之斯行居而不住妙齡強植勁節老

成被甲律儀下帷經藏方丈之室時歷十年簞瓢之食日
常一食信爲法本悟實如宗簡珠圓明經蓮清淨剃髮結
落亡境受除生起了於心緣覺被於物是以興補舊塔建
置尊容彌陀當其陽菩薩侍其側四大海水慧眼啟明五
須彌山毫相崇絕有若稽義撫實沿名討因都極樂之大
郊壽無量之景命備如昔者稱讚觀厥音聲克濟斯艱迺
復於遠則有階地超越自在神通發宏願心得大勢用皆
所以濡火宅軻劒輪投地者結業坐開入影者苦趣以息
粵若殫財竭力刻桷雕題積四三年模造化意寶殿蔚以

雲構金山煥其日臨豈徒然哉夫壯麗者將以重威神儀
形者將以攝歸止或離性解脫或見作隨緣藥草寓其根
莖雲雷感其方類即說非說若通不通惟三獸之渡河庶
一子之來學禪師以爲默則絕教言則牽文苟心事於化
人豈迹留於捨法會議斲石僉允圖功邕來守是邦偶聞
茲事依僧依佛何日忘之在家出家惟其常矣頃者下檄
湖海中明捕殺鱗羽咸若災疫以寧救蟻雖尚於沙彌涸
魚每憂於釋種祁寒則怨童子何知率三省於短懷寄一
塵於寶地別駕宏農楊公守堅字越石本枝鼎貴胄允岳

靈直道守公智印觀法司馬瑯琊王公元勗字固禮高闡
襲吉皇十令名資位升聞妙意融朗盛矣美矣左之右之
時有新羅通禪師五力上乘一門深入利行攝俗德水浮
天讚而演成恭而有述其詞曰

覆燾之獎始生終滅昭回之明內昏外徹陰入不斷心起
難折靈海慾深洪鑪火熱倬彼大師超然正覺亡境息想
示法流渥絕生死岸破煩惱殼度門光啟住地元邈傳燈
三葉分座一義象設儀形莊嚴地位有爲不染無相能離
苟曰法乘莫非種智古者豐石抗之高山紀事標柱銘勲

金定全唐文 卷三百六十四
三
列班廣茲妙有運彼元關則百伊昔粵吾無間

東林寺碑

并序

古者將有聖賢必應山岳尼邱啟於夫子鷲嶺保於釋迦
衡阜之託恩天台之棲顛豈徒然也故知土不厚則巨材
不生地不靈則異人不降陰隲潛運元符肇開宿根果於
福庭大事萌於淨土其來尚矣東林寺者晉太元九年慧
遠法師之所建也世居鴈門樓煩俗姓賈氏童妙神悟壯
立精博初涉華學不讀非聖之書中留范經尤邃是田之
說嘗就恒岳覲止道安火遇於薪玉成於器雖根種諸佛

而果得一時師子吼言載聞順喻維摩詰答更了空門安
住四依修捨二法和尚歎曰吾道行者惟此人焉屬朱序
尋戈緇徒逃海道由茲嶺冥契宿誠謂其徒曰是處崇勝
有足底居居地若無流池曷云法宇大誰神廟特異蓮峯
結跏一心開示五力以杖刺地應時涌泉既荷殊祥因立
精舍堅卧禁戒宏演妙乘浮囊毒流木鐸正教首唱南部
轉覺後人以智慧刀斷煩惱鎖由是真僧益廣妙供日崇
隘其本圖宏其別業乃進自香谷集夜安棲即曇現之門
生鄰慧永之阿若相與撰平圃踰層岩在山之陽居水之

右經其始而未究其末有所而未虞其勞當是時也桓
元司人柄幹國鈞以福莊嚴因憍檀施書日力之費盡土
木之功繚垣雲連厦屋天聳如來之室宛化出於林間帝
釋之幢忽飛來於空外至若奧宇冬煥高臺夏清玉水文
階而碧池瑶林藻庭而朱實琉璃之地月照灼而徘徊旃
檀之龕吹芬芳而秘醇相事畢集微妙絕時羅什致其澡
瓶巧窮雙口姚泓奉其雕像工極五年殷堪摳衣而每談
盧循避席而累贊道宏三界何止八部宅心聲聞十方足
使諸天迴首觀其育王贖罪文殊降形蹈海不沈驗於陶

侃迫火不爇夢於僧珍願苟存誠祈必通感旣多雨以出
日乍積陽以作霖則有形圖西來舍利東化或塔涌於地
或光屬於天謝客欣味而成文劉斐詆訶而覃思所以山
亞五岳江比四溟地憑法而自高物因詞而益重洎梁有
崇禪師者傳燈習明安心樂行指拳猶昔薪盡如生次有
果暉二法師僧寶所欽克和止觀法物爲大用繼住持上
座曇傑寺主道廉都維那道貞等皆沐浴福河棲止淨業
諸結已盡白黑雙遣衆生可度名色兩忘纂盛名於舊人
啟新意於今作重建雅頌遠託鄙夫代斲有慚豈云傷手

握筆餘勇曷議齊賢但相如好仁慕藺名而激節伯喈聞
義讀曹碑而敘能儻青包於藍冰寒於水非曰能也固請
學焉其詞曰

靈山兆發真僧感通刺泉有力呵神致功法儀外演禪心

內融性除遍執門開大空其瞻禮雲集底居峯薄越嶺圖

勝降平規博信臣檀施護供興作大起重階廣言阿閣其

巖幢湧出寶塔飛來尊容月滿法宇天開化城改築道樹

移栽松清梵樂石敞花臺其金容海其法影山薦毒龍業

消魚子心變萬里西傳一時東現華其異聞穹厚驚眇其

遠實法主謝惟文伯光頌累彰德名增勒助起江山聲流

金石一言可追千載相激

其五

了性了義或古或今止持紹

律定慧通心覩物情致懷緣道深敢憑淨業永紀禪林

其六

五臺山清涼寺碑

上尊王之分護大千也甘露以灑之慈雲以覆之香風以
熏之惠日以暖之忽恍乎無相之體通洞乎有形之類演
正法降毒龍在清涼之山苑經行之地其山也左溟渤右
孟津恒岳揭其前陰山屋其後五峯對聳四望崇崇蓄陰
陽之神秀含造化之奇特每至丹霄出日俯拍雲霞清漢

無波下看星月可以侔鷲嶺可以闢蓮宮在炎漢時卜中
箭領用肇造我清涼寺在北齊時以八州租稅食我緇徒
焉歷代帝王莫不崇飾洎我唐開元天寶聖文神武應道
皇帝丕宏妙教大闡元宗渥澤浸而恒河流景福烝而鐵
山固仍復舊號祇以修先是長安年中勅國師德感供以
幡花文殊應見於代具大神變發大光明儼兮似或存倏
兮無處所凡厥稽首咸懷欣懌傍顧此身盡在光影其畢
棄咎乃罔不休示立諸相而無所立廣度羣生而無所度
非大聖至神覆護其孰能如此者歟夫其清涼之爲狀也

壯矣麗矣高矣博矣靡可得而詳矣赫奕奕而燭地萃巍
巍而翊天寒暑隔闕於簷楣雷風擊薄於軒牖星樓月殿
憑林跨谷香窟花堂枕峯卧嶺尊顏有睟像設無聲觀之
者發惠而興敬居之者應如而合道天花覆地積雪交輝
梵響乘虛遠山相答珍木靈草仰施而紛榮神鐘異香降
祥而聞聽淒風烈烈誰辨冬春奔溜潺潺不知晨暮經所
謂吉祥之宅豈虛也哉開元二十有八載帝之元女曰永
穆公主銀漢炳靈瓊娥耀質發我上願歸乎大雄爰捨金
錢聿崇妙力奉爲皇帝恭造淨土諸像欽鑄銅鐘一駢之

金定全唐文 卷一百一十四
以七寶合之以三金影搖安樂之界聲震閻浮之國是以
滌除煩惱足以開鑿聾盲二沙門清白懷忠置陳於禪林
之院樹法幢以供之聲梵樂以安之惟時孟秋月望慶雲
出山西北圓光五百餘丈有萬菩薩同見其間前後感應
不可遽數意者其福我聖君乎天寶七載貴妃兄銀青光
祿大夫宏農縣開國男上柱國鴻臚卿楊鈺奉爲聖主寫
一切經五千四十八卷般若四教天台疏論二千卷俾鎮
寺焉海墨樹筆竹紙花書密藏妙論千章萬品置之以寶
案盛之以玉箱上褫祐於君親下澤潤於黔庶善夫上座

曇財寺主神慶都維那智詵入妙覺海登大空山大德忠
翰智空曇開如岸玉寶先覺蓮花不染高僧清超淨法雲
光庭觀谷蔭禪枝巖棲戒葉並鸞鳳比德龍象叶心豈即
舊而增修亦惟新而超構備致靈應昭彰邑郡以爲智德
斯遺靡籌稱謂句偈不忘式圖刊勒敢承前矩強述斯文
銘曰

天作五山兮實曰五臺山上出泉兮有龍爲災大聖煦嫗
兮戢毒徘徊西南其剎赫赫枚枚翠微之上兮萃嶺崔嵬
金容月滿兮寶座蓮開祈我聖皇兮其至矣哉以感以通

金定全唐文 卷二百六十四
今爲社爲福前際後際今無去無來

大唐贈歙州刺史葉公神道碑

公諱慧明字德昭南陽郡人也其先系自軒后彌於周文
聃季食沈子高封葉因爲氏矣逮問政偶孔好龍得真代
有聞也昔者惟帝興運乃聖炳靈風雲相從卜夢通感間
氣駿發良弼大來有開必先憑物爲象固自然矣則我使
君降仙府乘道流追蹤隱淪叶契幽叟結廬澗沚考槃巖
椒同人利貞遁代勿用雅好酒德尤邃老經話言解頤精
義絕倒誘進不倦虛納盡歡好事集門長者闡里每至升

月帷戶和風林薄植杖嘯谷席皮琴山泰然樂生澹乎忘
老方且惟性壽遯神仙徇赤松之游蹤黃老之術外身先
物歸根致柔緣以大均持以大定色理不盪寵辱不驚繩
繩焉熙熙焉孔德之容罔可測已故師長旌禮邦族與化
智者謂智仁者謂仁雖褐塞桑樞紵衣韋帶必避塗加敬
懷風惕息焉是用克聞於家大育厥允則我越公襲上德
延慶靈生而知之學而習之有專門之資得不丞之業纒
齟犴道旣冠同元訊遠嶽之福庭覲幽尋之方士陳咒雷
駭吐刃電光沈海莫濡蹈冶匪熱呵萬鬼搦百神啟陰官

之符變冥司之籙追究往事坐知來茲膏盲無所遁其形
霧露不能滋其疾竒跡多緒嘉聲日聞是以大君孔休辟
命薦至入自卧内問以咎徵造膝必誠偶事皆中時更四
紀代且五朝順風以請天師歛衽以近皇極緇素莫能出
右公卿是惟虛左國家有事天地將旅海嶽公嘗致禮加
璧能事潔羞傳駟載途郡邑迎謁者歲四三焉自頃賊臣
嗇禍小人吹蠱敢爲戎首與此厲階天步未亨人事將殆
公乃極陳幽贊大啟聖猷枚卜撰辰並走羣望作爲邦翰
先後主憂殄勦元凶翊扶皇統是嘉厥異式揚爾忠靈賞

茂於身寵贈光乎考匪此父也曷訓其子匪此子也曷揚
其親松楸已行碑板未立永念終古追存孝思驟請闕廷
第如江介遠訪才子枉逮鄙夫趙括論兵多闕舊學班固
述史實賴家書顧惟成章伏愧貞石其詞曰

真隱夷軌默仙解形倬哉獨立企古遐征殆庶元德升觀
丹經服鄉不涅光和无營築卜岑渚上藥侍琴徐嘯風谷
緩步月林白雲怡意清泉洗心曷勝不往曷奇不臨迹因
神遠情隨地深舉代方籍皇家未軾肇有懿子載揚令德
左慈致物越人辨色司察鬼謀役使神力寵被五君聲聞

八極日嘗薄蝕國有多難凶慝扇揚忠烈憤惋亦旣先覺
克圖幽贊皇哉神武赫然天斷薄言即戎於以戡亂帝念
酬庸典開列土豈曜厥身實贈於父朱藩乃錫紫綬是與
存致沒榮忠伸孝舉烈烈松柏緒風興悲表墓有闕紀德
無詞哀哀嚴蔭纒纒孝思孰傳終古是建豐碑贈慧明銀
青光祿大夫歙州刺史子道士法善授鴻臚卿封越國公
開元五年太歲丁巳鶉尾七月夷則七日甲辰建

贈安州都督王仁忠神道碑

觀厥君子大司莫盛於禮樂時事大竇莫極於寵榮非夫

周於財厚於行外無鬼怨內無人非將何以享而福之兼
而有之寅亮邦家武衛帝室者也府君諱仁忠字揖太原
祁人也其先系於有周氏於子晉文武不墜子孫其昌掌
兵霸秦爲相寧漢累葉交映兩朝相輝梁之狐鳴司徒匡
復於將亂周之龍躍開府扶翼於已興曾祖景孝府君隋
屯田侍郎祖詮府君皇朝明威將軍歛縣開國男汾州刺
史考文以府君侍郎御史吏部員外朝散大夫東臺舍人
並典學懿文夷道全德高舉時秀丕承國工府君至和有
純上德膺茂軌度恬簡品鑒朗拔篤誠博達英邁奇偉詩

書異等容貌出徒飄然清風藹然顥氣安步名教詠歌典
墳虚心以遊不思而得至於緝熙遠畧繩準嘉言寶匣于
將玉臺明鏡未云比也解褐濮州司法參軍要囚有倫亂
獄不作泣下丹筆情深赭衣俄轉湖州司兵參軍郵亭利
權豪富饒市脂膏不踐玉帛何階頃開元皇帝之潛春闈
也以府君后之季父時之正人吳札識音周瑜能聽遷太
常一簿尋以地近姻戚望出衣冠仍加朝散大夫試本寺
丞屬國家有事上元張皇大禮沿革舊典節制新儀超上
柱國而即真焉及皇上御極元妃昇后遷太了僕六馬肅

若具僚仰止朱袂皇皇鳴珮

關二
字

載遷鴻臚少卿四極梯

航萬首匍匐且和戎狄未繫單于
太常少卿九樂備陳
三禮大舉觀諸侯之會知天子之尊除左千牛衛將軍書
巡蓋常夜拜是功上謂府君曰昔太上皇嘗居此職特相
委任是屬親賢府君兢懼滿盈誠懇辭避鴻私屢抑嘉願
莫從霧露不宣腠理成疹詔使旁午御醫崩奔嗚呼杲日
或虧良歲多謝命莫能續天將謂何春秋六十有一以開
元十年三月癸酉朔捐館宇於京兆興寧里之私第皇帝
震悼椒宮感惻制贈安州都督賜物二百段米粟二百石

喪葬官供加元纁束帛勅萬年縣令韋令監護即以其年
八月壬寅朔安厝左翊太原舊塋禮也長子右衛長史嶷
次子尚衣奉御嵩司農主簿崑京兆府參軍崇峇芳峇峯
等並昭獎光訓憲矩令猷文翰發於國華禮則隱於人紀
追惟廣孝永言孔亟椎心陵谷泣血松楸是用合謀有成
作爲不朽直書盛德曲訪小才錫類每深注情彌極文章
莫及覽對何言其詞曰

千年流慶百代象賢山邱藏澤海水成田文武震耀冠蓋
蟬聯業揚史竹名雄鼎鉉其施及時英駿發后族體大志

宏氣和德倣秀舉清流高標雅俗地位雙昇才名兩復其二

太常禮樂儲宮調護屬國風偃司戎山固先帝昔官聖恩

今喻匪親曷保惟貞是附其三三旌未涉六疾爰臻擁福何

崇轉禍無神喪葬公備哀榮禮陳寵加黃壤贈及朱輪其四

松柏舊塋元纁今飾詔使頻繁椒宮慘惻河山動容風雲

變色茲焉永懷古之遺直其五光有允子克荷良弓臣孝家

節文章代工椎心匍匐泣血無窮託碑板以題述庶哀敬

而永終其六

長安縣尉贈隴州刺史王府君神道碑

邕聞才不必用慶有必鍾盡滯或牽於時首正終會於古
故志氣也不謀於食而謀於道生祿也不在其身即在其
子始終備致後起追襲謀翼孔彰前循邁種互體相發他
日同時哀榮大來幽明通感長河一曲所以端其濬源高
山四成所以極其層阜粵未可測已府君諱行果字某太
原晉陽人也其先抵於嚳稷幹於季文枝於翦離條於吉
駿代關絕史朝弗曠官自古及今令名不去六代祖叡後
魏尚書令封中山王贈太宰諡曰宣五代祖襲吏部尚書
嗣中山王諡曰惠高祖忻散騎常侍北肆州刺史諡曰穆

曾祖子景徐州別駕北豫州司馬祖元季府君屬隋政分
崩賢人伏匿誓言避地執心葆光迫以族弟本州遠慮物
義辟大中正開府儀同三司考有宏府君皇朝岷州刺史
皆寵義從禮尊仁依信增業以行道兼濟以守官府君間
氣茂靈上德純粹風度簡曠神情秀拔衣冠禮樂超等出
徒博達聰明舉衆敵國無成足乎多藝不器非其一名讀
聖人之書閱上將之畧每及忠公大節孝友至情大息戶
庭垂涕枕席憮然有開物致君之意立德顯親之心皇士
目之通才許之好仁從田蘇之遊求已慕蘭生之義至於

手畫耳聽口誦目數覆碑背局答難賦詩公每屑焉人所服者弱冠以方聞授潤州司兵參軍事自頃上官養求同案侵欲或專咨儉嗇或懷其安荒一覲禮容載敷先訓不俟憲矩若對神明信所謂正刺邪德形物至於此也未幾宅岷州府君憂七日絕漿三年廬墓泣變青柏祥臻素烏野老明徵邦牧表異府君泣面而視瀝肝而言曰所不死者恐貽慈母痛悼豈願居單外買聲名叩頭止之外除宋州司戶參軍日者甫無水虎土有凶年奸吏舞文詭隨畢賦誅求公聚作爲賙給百習爲常焉府君位其農郊什其

居室正之以法糾之以詞勿言寬征足革舊染議者以爲
平宰社肉武習宮人一荒知秋百爲有典矣總章歲駒麗
負海欺天國家汎舟討罰銜急宣之明命濟懸軍之見糧
董其轉輸舉於幹職是役也繫公遷長安尉無何丁太夫
人艱禮異於經毀甚於昔且二尊孝等偏罰事殊往顧慈
親今極真性臨穴號叫仰天殞絕嗚呼孝歟春秋三十有
七夫經德而天代人所悲執喪而滅錫類所痛有一於此
則可以束名教感人倫況兼而極乎夫人中山甄氏父雍
州豐崇府左別將黃陂縣開國男食邑三百戶行府君之

息女嬪有令言母有葬則從夫德貴訓子業崇力遷於山
祔同於穴粵以景龍三年歲次己酉十一月庚寅朔十二
日壬寅合葬於洛陽清風鄉之原禮也長子駿慷慨英達
激揚忠孝誦習文忠昭宣幹畧元宰經國止將眎師申通
明之偉才竭寅亮之誠節其志如石其心如丹五閭三連

小籍多得空始

一作細疑

無所逞其計合散無所用其鋒李牧

十年武侯七縱盡兵聲於河外揚主威於海濱三士列其
多備九原備其光寵開元十一年九月八日制曰存樹其
沒而不朽緬懷褒飾宏是典章兵部尚書同中書門下

三品上柱國行果粒靈誕和敏德成器高節夙著盛名有
歸雅志未伸促齡永謝象賢之美不展於亨衢而積善之
徵克崇於後嗣歲紀方邈徽猷自遠宜申寵贈可使持節
隴州諸軍事隴州刺史勲如故次子暉故汾州永壽宰神
和體正經明行修有角無齒惟天之道與才不壽匪身之
辜兄也孔懷緬然增感願述先德克贊豐碑高燥有以壯
孝心樵蘇有以敬賢墓其詞曰

德不孤慶有續迹時晦賢必復名實才尊匪祿博技藝窮
簡竹耳聽聞心以蓄手未止目猶逐碑可背奕能覆坐嘯

委行道勗孝深至滅太蹙獎教義揚雅俗位嘗卑齡雖促
推仁信致戩穀鍾令子發華族振武威廣文囿經廟堂掃
邊服昭皇考贈丹轂臣義著子道足哀且榮幽旣燭考罔
已性相屬碑乃建神所福

唐贈太子少保劉知柔神道碑

邕聞古之常銓今之大寶或籍地因勢或經德自身或禮
樂國工或詞學時秀或貴盛終吉或等祀老成或廣孝聞
家或納忠刑國有一於是則百斯慶書於牘大其聞矧乃
總集高曾備致昆弟悉數以周稱同原而合流息女擇於

賢夫允子訓於良治首止光寵出入震耀若此表裏者矣
府君姓劉氏諱知柔字某彭城人也其先府君母弟銀青
光祿大夫左常侍崇文館學士修國史子元按史諜推之
楚孝王囂之後粵若伯豫談經景瑜志學令言穎邁王喬
名理迴仁之撫接內使之節義是以嗣前人食舊德鼓簧
史傳柱石邦家其來遠矣高祖魏驃騎大將軍北州刺史
禕府君諡曰懿曾祖齊散騎常侍文林館學士岷府君祖
朝散大夫陳留縣長元邃府君考宋州司馬贈徐州刺史
藏器府君莫不都長忠方簡質貞亮業行優絕政理殊尤

府君稚節一成立年博達典學爲海懿文爲林鎮重爲山
幽靜爲谷清淡事約言遣理深謙常後身儉不逼下至若
儀形碩偉風神散逸立若尸祭坐若肅賓認金不爭闕馬
引罪公庭絕於私議虛室造於元門遠遺之觀物則名顏
子之問一知十無以過也嘗以爲權畧多疊皦察不祥和
令乃私靜勝而言立莫神怨行莫人誅固能陳無兵火無
熱變奪物性延集福根然後至精啟純全德居厚崇化務
俗樹德垂聲可也識者以爲張華茂才荀彧遠畧雖曰王
佐則無天年今府君二者兼之一言得矣觀藝知巧覩葉

知秋吉祿大來壽考休佑吾無間然矣逮計考甲科薄遊
異迹宅憂殆滅有命從師辭爵廬墳受錫表闕黨錮光復
佐職艱貞歷荆府司馬史氏詳矣自皇運啟聖清途授德
典國胄司人曹拜司業兼侍讀漸也府君雅仗忠公固拒
權寵恥或趨貴哲不易方出荆府長史復戶部徙同宋二
州揚益二府一淮南廉察再山東巡撫加銀青光祿大夫
進爵彭城侯大府有四公居其三要轄有三公提其兩冢
卿有九公自屬國二年尚書有六公以司空十載分爵有
五公當侯伯之榮居守有一公兼宗祏之寄巡使有十公

兼東土之俗疑輔有三公首儲宮之傳至於仁以養之義以行之慎憲以恤人闢土以祈穀制曰黃霸之奉法循理錫以高車郭賀之惠化仁明加其冕服至於發貯賑施書板賦財已擊單于且平水土制曰出膺賢守則郡國循良入侯名臣則衣冠準的俾遷榮於北斗宜作範於南宮夫如是有足以論道經邦助天開化增河海之渥澤近日月之景光府君止足發衷辭滿得地終讓八座還忌三旌聖上錄德序功養老懷舊就成頤攝留連間曠制曰乃建儲貳聿求賓客允茲懋官惟爾崇德府君固乞骸骨退守田

園恩命如第尚給全祿嗚呼日有旻歲有除澤藏山風振
海矧伊人也矧伊人也春秋七十有五以開元十一年六
月十五日遇疾薨於東都康俗里之私第皇情震悼追褒
薦及制曰簪纓舊德楨幹通才清以立身儉而率下出入
三署綢繆兩宮曾不憖遺奄然喪逝言念遺老惻悼於懷
宜寵贈章式旌泉壤可贈太子少保物二百段米粟各二
百石葬日官供幔幕手力等太常考行諡曰文以某年月
日葬於河南府緱氏縣景文山原禮也府君昔在平日深
戒厚葬祖載服用子壻黃門侍郎宗子暉所營奉祠子某

官某等追惟先志臨穴長號謹以焚之殆無遺者尚曰史冊者場乎名碑版者紀於迹今願抒哀敬却樵蘇發頌聲彰末鬪邕曰唯唯敢不十一千百焉其詞曰

漢起沛楚封徐代則九慶實餘惟英秀粵卓犖惣文史張禮樂諫而尊道而勝集百祿延周稱貴自八榮可榮弟紫綬堦黃門始孝思後忠烈歷中外備名節以彌長聲更揚

隱屬國老文昌懷遠圖忌太盛謝人爵委命月有虧日

有是皇恩動物情惻猗孝子奉惟訓服用薄哀榮順布史簡繼碑石名教開幽名激

欽定全唐文卷二百六十五目錄

李邕 五

中大夫上柱國鄂州刺史盧府君神道碑

逸人竇居士神道碑

桂府長史程府君神道碑

唐故雲麾將軍右武衛大將軍贈秦州都督彭國

公諡曰昭公李府君神道碑 并序

左羽林大將軍臧公神道碑

唐東京福唐觀鄧天師碣

羽林大將軍臧公墓誌銘

雲麾將軍碑

公諱曰... 李執事... 碑

... 大將軍... 碑

... 碑

... 碑

... 碑

李

... 碑

欽定全唐文卷二百六十五

李邕五

中大夫上柱國鄂州刺史盧府君神道碑

嘗以清白者賢操之行理速者公人之業矧乃周仁以子

物濟義以

闕二字

酌

闕三字

畢

闕六字

所以

闕九字

車未下而威先

館未即而恩洽衢陌歌頌風俗昇聞

闕二字

披

闕一字

歷

闕二字

德

闕五字

其在

闕一字

也

四字

姓之後唐堯理水伯夷封於呂

城周武興

闕一字

太公

闕一字

於齊國

闕二十八字

子左庶子祖諱

素隋晉州別駕考諱安壽緜州長史莫不

闕二字

禮

闕五字

言闕十友至性遠與古人貞拔休風高視當代學觀古闕一

字樂聽雅聲闕三以闕三兌闕一以闕一欲闕十同於席闕一

解褐冀州信都主簿改絳州太平丞階以昇進闕二不闕四

字清闕三忠公闕十無闕一科賦有條尋宅闕一畢殆滅闕一

至性廬墓沫血闕二茹荼服除轉闕一州闕五恩五恩五

除洛州新安宰以犯諱更滎陽率下以闕二民以孝散闕一

字以闕四以闕二十不捨過而獄無其辜匪貸恩而人有

其愛莅政闕一矜闕二十書是降皇帝問洛州滎陽縣

令盧正道闕二十祿七褒美政勉勗終始無替嘉聲賜

卿絹二十匹闕二字 蒲州闕一字 馬闕二十字 錦州員外司馬朝

廷以罰不及嗣罪不在闕一字 收之以闕二十字 江東按察判

官偕薦德樹賢黜邪闕一字 惡汙吏阻格闕一字 人闕二字 尋遷

闕一 州闕十字 飲水賦詩意誠而公義直而亮庭無宿諾事

不闕一字 於闕二字 無闕一字 言闕一字 不闕一字 於闕二十字 通闕一字

昔金為闕三 從遊日月有來藥物無效神闕二字 及闕十字 以

開元十四年闕十字 修里之私第時宰咸闕一字 朝闕一字 嗟歎

將智逝矣乞言闕一字 乎以開元十三年二月闕一字 六月闕一字

字 曆闕二字 安山闕一字 先塋之闕一字 禮也夫人滎陽郡闕一字

次定全唐文 卷三百六十五 李邕 二

君闕一氏廣州闕一史元度府君之息女嚴慈訓子闕二

事姑才德昭宣闕七姓宜闕一室闕三翼後時闕三祔仲

子寬朝散大夫闕一陵令叔子澈太原府士曹並彝闕四

長齡促闕三堅前桃林宰季子曉闕五州司馬闕一子闕一

字闕一太子宮門郎皆在邦聞人惟家有子文史足以達闕一

氣闕一迹闕一以闕三將以先公闕一休畢闕十銘泣柏

淚枯號天氣絕敬申遺恨遠託故人闕二莫追闕二不闕一

字其詞曰

地藉慶靈兮誕生岐俊博總技藝兮含宏忠信錦闕

今雲飛筆陣闕四字
今闕三字
進宰縣闕八字
志葆光兮懸

早解印除日歲幹兮舉燭風迅蒼生有闕一字
兮皇天不憖

蕭蕭闕字
門兮闕十字
近

逸人竇居士神道碑

觀夫道義重者則土芥寵祿闕一字
氣廣者則湫阨山林是

以混然闕字
人闕一字
在於蕪闕二字
然闕一字
事不入於市朝

其服也鄉其行也獨介如闕一字
石闕三字
蘭所以名與風翔

業與時並闕一字
稱君子詩曰碩人其在茲也居士諱天生

字自然扶風人也其先出自夏后少康之允闕一字
晉大夫

漢丞相演班固之書豈徒保闕一河而累葉胙土掃

北朔而千載銘山因闕一秦闕一今為京兆人矣曾祖居

士諱闕一祖居士諱希求考居士諱闕二幽抱虛壑閑卧

深林黃卷晨開素琴夕引臨沼而下視天鏡仰山而高詠

雲莊雖迹在人間而志逸區外居士幼而神秀長而恬和

習志闕三人育沈冥於後闕一高尚芝桂闕一易衣冠其

凝神也氣細於虛其闕一節也冰寒於水則知瓊林玉樹

迴出塵容闕二蓬瀛遙登仙子是以好闕三名流重真背

郊塵變輿馬或靈藥一器或闕一酒一壺接道闕一於野

庭申秘

闕字

於

闕字

座曷云招隱聊且懷人至若賦詩

闕一

字

言比物

闕字

意眇默

闕字

遙昇天莫知曾深但仰元妙

時有流俗親懿勸誘浮榮論葉縣於漢仙比漆

闕字

於宋

傲南郭槁木東方耀星出處有以

闕字

名言論有以軌

闕三

字

蕪沒三徑淪滑百齡而以飛遜居貞辭

闕字

既與夫

五辟未就六

闕字

不行披霄褐以

闕字

冠雲冕

闕字

非

所取也居士乃軒辭解謝

闕字

太息而言曰僕聞子面吾

面肇允不同以馬視馬亦既有異矧爾改父之道則死孝

曷申為身之謀則生慮曷保

闕字

堯舜在上巢由在下

闕三

次定公

李邕

字

國則如此以家又如彼自可永

闕一字

元覽悠悠素襟沒

緡清流隱几磐石豈不泰歟議者以為風神照人文史滿

腹

闕一字

聲大谷絕迹幽巖

闕四字

有膏者不煎有爪者不搏

才不同也

闕一字

何為乎居士賡辭曰且駢指者疾多言者

窮意者

闕一字

欲

闕一字

無為

闕二字

道身貴寶貝所以食

闕三字

寵珍羞所以却吾粒豈徒弄沆瀣踐莓苔買山以游沽名

而隱者也

闕一字

後

闕一字

薄當軸曾

闕一字

閉關微赤松不追

匪黃庭不誦聊以卒歲式用

闕三字

呼鶴矯神遷蟬蛻形解

雖人事似促而仙路實遐以長安二年正月十三日

闕二字

化於闕二時春秋六十夫人沛郡太夫人朱氏性與闕五

親始則輔德從夫終則擇鄰翼子光啟釋教休有禮防傳

繫肘之方得觀碁之樂享年八十有六以開元十闕一年

三月七日示滅於京闕三以其年十月十六日合葬於五

齋原禮也長子處賓才與命違壽惟神闕一丹穴之色闕一

字變鳳毛青田之姿闕五悲人代高步仙遊闕三賓早慕

嗇神久承元覽無玉帛之樂事闕一詩禮之雅闕一人求

我知我棄人欲貂蟬莫耀荆菊是馨季子正議大夫行內

侍上柱國元禮多闕三全節冠時以孝則忠曰慈故勇西

次定全唐文 卷一百一十五 五

南護塞設五闕一以闕一謀東北闕一戎縱一鼓而包敵

由是昭宣豹畧作為虎臣歸西戎之數闕四之闕三尅以

少謀勝取多歐脫連頭而受誅穹廬屈膝而請命燕山之

石揚先祖之刻銘屬國之官笑闕一來之繫頸闕三迫公

事違阻闕一心不闕三松楸身廬塋墓猶且匍匐泣血擗

踴椎心闕一天地以昭親表山河而刻石其詞曰

一門養素兮四葉探元遺土軒蓋兮含景靈仙凝神闕一

谷兮洗耳寒泉笙歌蕭闕一兮闕一鶴翩翩揮手闕一兮

長歌紫闕四日兮遼柱闕三勿求之兮吾將惜焉有美厥

後兮是稱其賢闕字闕一 名四主兮宣力三邊孝家忠國兮揚

親闕字闕一 天闕字闕一 行闕字闕一 兮性闕字闕三 倬彼石表兮永矣松阡

桂府長史程府君神道碑

觀厥品目異等業尚獻臣天與才名神福壽考而中留官
序小往代艱位不極乎多能績未宣其利用戢駿翻韜良
工悲聲起於絕絃泣涕形於抱玉自傷楚老豈獨公明而
已哉公諱某字某廣平新安人也其先出自顓頊重黎之
後周之休父入為司馬漢之不識擢居衛尉至若昱輔魏
土嬰立趙孤奉日以納忠殺身以明節精誠發於寤寐義

烈冠於人倫宜其貽謀克家寵光形國業與時並名與功
諧者也五代祖嚮府君陳襲重安侯隋蕭縣宰四代祖育
府君隋車騎將軍曾祖皆府君隋涿郡主簿大父宏府君
皇朝安陽令考大辨府君泗水六合二縣宰撰東征記兩
卷藏之秘省莫不託宿元德從事老成典學積於蓬山能
賦秀於詞苑府君令始家則光有國庠博通全經悉數賢
行孝曰曾子文似相如下筆不休遣言無擇陳平長者把
臂每多田蘇好仁引繩相重解褐徐城尉始足下也旋應
五臣昇第遷宋城轉櫟城簿王畿政重帝告事先握札雲

飛聽訟風味 戰擢來廷長安二赤縣尉搏銜御黠夙駕承
天驚暗若神應對猶響籍聽擢左臺監察御史仁克寬文
無害恥爲諄刻雅欲優閑朝廷許之轉詹事府司直歷城
門郎長社武進朝邑曲沃好時雲陽宰六縣皆代工開化
順時布和慎簡里胥周省條簿其清水鑑其坦砥平從心
術以外形隨手妙以旁發人樂新政俗勸古風載遷魏州
司馬靜守憲矩審喻案察官師有章人吏不黷屬后族黜
免允嗣姻連奏引諫書醜詆宰輔選其頗闕一正其奸賊
志士寒心朋家質首左遷府君饒州焉嫡子昕崖州舍城

尉俄轉府君桂府泊島夷干誅天師問罪憑險縱毒送死
阻兵斲乃不俟檄徵自促銳陣挺身而當矢石技而而覆
寇讎馬旋泥中人走岩下憤氣雖作救兵莫_如劔交於胷
戈達於腋其命則殞其目不瞑嗚呼爭首謂忠供用謂勇
倉卒歸盡零落無成有感路人愍悼慈父沉悲生疾積痛
傷年猿堪斷腸鳥可銜木人非命也天何問焉以開元十
六年十月五日奄徂化於官舍以某年月日及葬於某原
舊塋禮也夫人廣宗潘氏封某縣君即銀州刺史寶勣之
息女柔茲孔嘉貞淑丕訓是仗君子宜偕永年桃李早零

松柏同衿子皓曜曦等並才彥惟有名教克開優游翰墨
之場造次仁善之域宅憂殆滅追孝有望匍匐昭親哀迷
紀石邕以披顏友道列坐詞人談笑未終存歿相訣情也
有慟涕之無從雖不工於文將達於意其詞曰

曾源積兮流彌長高闈慶兮齡亦壽命不泰兮時未將何
寵祿之中否徒政理之孔臧坐踈屬之嬰累重愛子之飛
章遭一門兮二謫備周歲兮兩喪寄永懷兮身後唯沒代
兮名揚

唐故雲麾將軍右武衛大將軍贈秦州都督彭國

公諡曰昭公李府君神道碑

并序

觀夫地高公族才秀國華德名昭宣沖用微婉動必簡久

言必典彝人之儀形

闕一字

以為

闕三字

守中轄重養福亢

宗以長其代邁德以閱其門者其惟我彭國公歟公諱思

訓字建隴西狄道人也

闕三十二字

至信徙於秦克復其任子

仲翔討叛羌於狄道子伯考因家焉洎孫漢前將軍廣子

侍中

闕一字

十四代孫暲

闕十

曾祖

闕十

卿諱叔良都原州

長史華陽縣開國公贈寧州刺史諱孝斌或集事雲雷擁

旄為將或

闕一字

光日月

闕九

禮以

闕三

以

闕十

然寡欲超

然遠尋好山海圖慕神仙事且東以名教阻於從游乃博

覽羣書精慮闕一字藝百闕一字偕妙一闕二字知闕二十聳義

直道首公非忠益之論不關於言非侯度之暮不介其意

夫如此可以近大化漸家闕一字功烈闕三字畢子贊禹甘生

相秦莫可得而聞已十有四補崇文生舉經明行修科甲

明年吏闕一字以文翰擢闕三十未幾加朝散大夫滿歲除

常州司倉參軍事出納之恡職司其憂蓋小小者於時也

鼎湖龍昇闕三十興二闕一字之歎近關而出罔知所從臨

河而還復將安處僂俛轉揚州江都宰公曰五行四時十

二月闕二字為闕一字五音六律闕八字之多闕十二字義闕一字其一闕一字

字情敷祐話言所以廣德化扇揚和氣所以暢仁心及履

霜堅冰終風折木公歎曰天闕三十以闕一字家闕一字詬俟

時變名求活所恨南陽宗子未舉勤王西京宰臣不聞復

辟者曠十有六載及闕二十位莫非其人徵拜太常寺丞

漸也未月遷太府員外少卿五旬擢宗正即真彤伯加隴

西郡開國公食邑二千戶闕三十吠傷嗣害國誘關通之

邪甘言卑詞售讒巧之譖助逆封已害正亂朝公密奏封

章累闕一字啟沃闕四字動率闕一字迴闕一字納闕一字孽之諛

開臣禍之兆放逐勲舊慰薦寇讎后族握兵黨與屯衛佐

佐賈勇凶凶作威持戟闕一其闕二十或闕七之闕一或

外廷揣摩飛白鳥之難然以楚兵致討嘗懼季良淮南荐

凶獨防汲黯出公為岐州刺史累闕三以闕三舊也家富

勢足目指氣使驅掠以為浮費劔戟以為盜夸公乃急於

長雄緩於闕二峻闕三十國朝以時泰崇文事危尚武取

申忠義具屈才能以左屯衛將軍徵家口並給傳乘議者

以為式是闕三十義闕三嶠則文雅治通故散騎平遷侍

中兼掌昔也所重今之所難公得之矣復換散騎常侍闕四

字應闕二十之一闕一以圖書闕一此之再任以心膺昇

故一從一橫一文一武丈夫也君子哉尋拜右羽林衛大

將軍以闕三十渝考中上又更右武衛大將軍且師丹廉

貞則拜斯職宋昌心腹三登厥官或以闕十於闕二門也

因假開喻是究竟談以實明宗非差別行其道流也默論

參元深闕一見聖始作闕一於不闕四於闕十地之紀導

字闕二之闕四之闕六翼皇道決策謀府經德智囊而日月

有除霧露成疾莫可救藥誰能度思嗚呼春秋六十六以

開元闕一年八月闕九第闕十州郡督贈布絹四百端匹

米粟四百石葬日官給諡曰昭公宜家魏國夫人竇氏德

心守彛禮容宏矩

闕十
三字

嗚呼

闕十
四字

不

闕一
字

悲夫以八年六

月廿八日合祔陪於橋陵園禮也姪吏部尚書兼中書令

集賢院學士修國史

闕二
字

公

闕十
一字

一

闕十
八字

布和宏恕以歸

厚刑器有典軌物有倫嘗追如父之恩是切加人之感相

與公之長子朝議大夫魏州別駕

闕二十
八字

賢院昭道等並

才名用譽業尚居多至性純深終天孔亟嘗恐竹簡紀事

未極聲華石

闕四
字

揚風烈

闕十
二字

之

闕二
字

名

闕一
字

之

麟定時秀人才國工詩書樂地典禮良弓率心載德濟義

輸忠湖海雅度闕二清風乃闕一槐集闕四伊昔闕五窮

闕十通赫赫復闕一振振秩宗三思嗇禍諸韋荐兇憂纏

家國氣薄華嵩闕七同闕七衝闕七雄闕十子惟孝靈龜

是從桐柏烈烈碑闕崇崇盛業何許佳城此中

左羽林大將軍臧公神道碑

夫兵者天之威將者人之命非武功不足以遏虐非智勩

不足以視師故四朝簡才三邊受略百姓拉之如朽五變

轉之若丸橫大漠而左迴出高闕而右去狄虜懷柔以納

質凶奴辟易以破膽數騎深偵解鞍却敵入陣周迺搖扇

坐謀矧乃大誰羽林離衛宸極蓄志堅石誓心渥丹捧日
廓於九霄戴天旋於四孟千年聖主幸而逢之一代勲臣
鮮哉稀矣公諱懷亮字時明東莞莒人也其先派於后稷
演於周公伯魯孝公子臧因而爲氏昔僖伯諫隱觀魚哀
伯諫桓納鼎魯多君子視履考祥是以知其有後矣降自
璋漢城陽王太傅暉蜀郡太守混晉東海內史曾祖滿府
君隋銀青光祿大夫海州總管東海公祖寵府君皇朝請
大夫靈州長史襲東海公考德府君皇朝散大夫原州司
馬贈銀州刺史上柱國莫不納忠詞光訓彝則大乃嗣種

德在人子孫並於昌時龜組疊於榮問公濬發卓犖雄舉

倜儻風雨之氣凜凜出徒金玉之聲鏘鏘激物問家以廣

孝形國以盡忠朋執義之昆弟友之雖文忠老成而壯武

特立自左衛勳應穿葉附枝舉登科授左玉鈐胡府長上

始足下也尋以天驕送~~三~~ 禮兵占募出奇衝突包敵

遷鴻州長道府左果毅~~三~~ 志獎充平狄軍都虞候紂

管轉左衛陝州華望府左果毅長上屬雜虜侵~~三~~ 別將

倚角橫戈掉戰匹馬飛行拜遊擊將軍本府折衝都尉仍

長上公自任邊事每讀兵書山川之形不勞聚米戰陣之

勢有以成圖驟施交賢博聞求已習明以至用宏畧以壯
猷故兵部尚書同中書門下三品平章事韓國公張府君
年位不侔志業相許引之入幕辟以論兵抗禮肅庭握手
密坐嘗謂人曰此子才經文武氣蓋華夷逸翮將搏巨鱗
必縱雖趙有李牧漢有衛青練彼朔方勦於獯虜無以居
其右也由是聲聞於天威震於朔凡欲追討皆籍率先洎
單于紹親間道畧地絕沙漠闕一字冰河公乃連馬拽柴多
旗具火詐示遼擊爲出分軍虜以表裏驚疑沮衄奔散轉
懷州南陽府折衝都尉仍長上朝議以元功未塞後命載

加遷寧遠將軍左領軍衛懷州景福府折衝仍長上充大
武軍遊奕副使除定遠將軍大衛雍州通樂府折衝仍長
上充大武軍國慶加明威將軍本衛左郎仍充東受降城
副使公以虜騎應來備預宜速出敵不意惟我有謀乃毒
以井泉焚以草莽中休罔以秣馬夕炊罔以汲人虜歎曰
可北而不可以南可望而不可以至公之謀也累加宣威
將軍使仍舊載遷忠武將軍左郎將兼安北副都護匈奴
以地闕援孤士寡糧絕蟻附城下雨射城中公乃偃旄麾
匿金鼓懸門不發矜甲不陳匈奴且夕却軍遲明出塞以

功遷單于都護借紫金魚袋公以北鄙禦寇中道扼喉生
門以攜之死地以誘之覘其西也將驚其前察其東也將
襲其後匈奴進退岐路迴旋二年議者以爲約之不以長
繩固之不以陷穽非公用智全勝按甲養兵安能預於此
恩制加銀青光祿大夫單于副大都護兼朔方軍副大總
管上蔡縣開國男公理兵戒嚴撫下勤至感恩挾纊攝威
蹈火匈奴不南牧職公之故也拜靈州都督兼豐安軍經
畧大使兼朔方軍大總管上蔡縣開國子匈奴利於馬牛
指於靈夏嘗以三城分守上將專征議雖畫於河南身竟

潛於漠北轉鄯州都督兼河源軍經畧使營田大使上蔡
縣開國伯公曰且耕且戰足食足兵古制也於是闢屯積
穀高壘止戈轉輸勩勞校卒加勸公之經也恩加雲麾將
軍左武威衛將軍兼洮州都督莫門軍經畧營田大使隴
西節度副大使上蔡縣開國侯吐蕃恃衆無名嗇禍有素
遠掠邇牧橫掉我軍公乃下以單師張以厚陣惑之以聚
散分之以從橫左右夾攻首尾盡殪日公當西守虜蕃南
侵獲其迹人審其陰計咸以投艱在將解控惟在疑復以
本官兼勝州都督東受降城大使營田大使兼朔方軍大

總管上蔡縣開國公會六州九胡洊凶階亂倉卒起於懷
袖雜沓混於賓主虜接塞聯馬肥弓勁其駭人也公分於
二蕃制於散地持必攻之郡計必死之凶上奇兵以四征
保危堞以內備雖諸軍合勢而殊效特高恩拜右武衛大
將軍賜物三百段餘如故自頃牧胡殘孽留匿傍山或求
食斂攘或逃死嘯聚猖狂三窟澶漫數州關隴震驚道路
危阻復拜公朔川軍副大使節度河東道諸軍州兵馬圖
是寇也公以設騎雙絕誠難必擒夷險五岳非便不克乃
傍山釋馬依林去弓接之以銛戈扼之以武旅襲其所短

運其所長凶逆鞠窮旬月底定以功最拜羽林衛大將軍
復以本官兼安東大都護府都督攝御史中丞平盧軍節
度使支度營田海運大使往者奚霫諸蕃之詭信也西屬
匈奴南寇幽薊乘閒每鈔無虞亟和公以兵數實多藉用
尤費輕舉則外患不解大舉則內攻更深是以傳陰符移
閒謀飛言以誤其使重賞以賣其鄰旣伐碩交且斷右臂
所謂以武闢武以夷攻夷雖賈誼計然晁錯策得無以尚
也朝廷多之拜冠軍大將軍復本任東莞郡開國公及神
武告天有成登岳展禮白羽日野朱旗霞山臨之以天儀

列之以地陣公以駿奔走驅熊羆智勞促來風疾孔亟詔
使累降御醫游臻舊疴有痊後命遄拜復起前任無何以
本官致仕聖上以公節不可奪故信臣禁兵畧不可謀故
臨遣武事入爲心膂出作爪牙非夫至公如貔如武焉可
遠符夜拜雅杖邊秋萬里爲城四鎮爲岳澄北海之濤水
掃西沙之風昏者哉及乎暮律田園莊座枕蓆壯心不已
餘興未并宿昔霸陵意將軍之夜獵屏營細柳冀天子之
幸臨去鷲悲鳴疲驂跼顧賓御太息覽對永懷嗚呼日也
者飄入於泉山也者藏歸於澤人謂之遊神謂之遷其可

若何以開元十七年八月二十二日薨於京師平康里之私第春秋六十有八主上感悼邊人掩泣羊祜罷市耿恭勢面見於此矣明年秋七月日葬於白鹿原禮也長子敬廉定遠將軍前檢校左監門衛中郎將上柱國次子希莊中大夫前安北都護上柱國三子敬之前左金吾衛中候賜緋魚袋上柱國四子奉忠前左司禦率府長史賜緋魚袋上柱國五子敬泚前殿中省進馬上柱國並淳孝濟義昭武懿文檢崇讓以後身率周仁以集事光備慈訓追遠先塋雖史簡可傳而碑板尚闕顧予以舊執詢予以小才

博殷而札翰未宣體大而褒揚不際將竭虛薄曾深其詞
云爾

惟至聖兮內外無憂任英武兮出入孔休總戎幕兮四紀

關一字羽林兮六周樹元勳兮特立隱敵國兮鮮儔救河曲

兮走朔方解遼海兮振漁陽一生一死兮鞍甲卧沙關一字

雪兮疆場橫匹馬兮飛將起萬里兮邊防忠則極兮志亦

苦年且高兮疾不愈事枕席兮忘家瞻日月兮戀主情還

遲兮怛化魂恍惚兮破虜志何深兮命何促時不與兮才

不贖碑一代兮人英征九原兮鬼籙嘉忠孝兮題紀貽永

載兮陵谷

唐東京福唐觀鄧天師碣

嘗以天者常生於人之前人者常化於天之後常生常化
其惟天與人乎有物有馮者其惟天仙乎不生不化者其
惟大聖乎無爲無事者其惟尊師乎師諱思瓘家於臨川
隱於麻姑山其先出自有殷春秋後子孫因國爲南陽望
族後漢有太傅禹蜀有車騎將軍揚武侯芝晉有武威太
守世龍以至曾祖和祖浦考嗣偕秉哲衣德參寥洞元代
有人矣且源派分流達於江海之內父子傳氣合於天地

之初尊師幼入廬山中移恒嶽吸沆瀣漱清泠精魄冥於
太虛耳目靜於穹谷身枯木心死灰固不如也開元二十
三載皇上下明詔求方士聞本郡別乘李行禕以尊師應
辟焉帝請問所習雅重其言常齋太一宮集元元教慮失
諸野思得其人臨遣尊師俾巡江南六十郡冥搜元覽欲
以張皇大道開覺下人明年春二月甲子復命稱旨意勅
度爲道士名曰紫陽仍賜紫羅法衣一副絹一百匹配東
京福唐觀兼本郡龍興觀以寵之議者以尊師心奉於道
身事於君名師於鄉德揚於國莫之比也五月三日又賜

絹一百匹紫羅法衣一副所謂高其行而累於賜貴其言而尊於服我聖人之用心也九月七日扈從西京勅安置同德興唐觀君子曰尊師與聖同德而興我唐乃居此觀躡也二十五年冬恩勅許歸覲省出中使二人監侍渥承於主榮及其親兼遂者鮮矣二十六年春特勅詣中岳王屋函谷宗聖及諸名山修功德其所至也神兵降於壇上慶雲集於山下元鶴徘徊於霄漢丹芝鬱馥於原野上聞而嘉之又賜紫羅法衣兩副將以服一生之體潔帛五束將以當五方之鎮綵綾六段將以成純陽四九之數錢十

二萬千將以合日月十二時之會僉曰天物備矣道心行矣二月甲子一日兩詔偕召七人初爲中禁潔齋後以真源謁廟重聞天聖獨以道高二十七年冬十月朔七日駕幸溫泉宮恩令太元觀安置子夜過半仙裝聿來顧謂門人竹務猷曰虎駕雲車門外十乘青童執節庭中二人吾當從之此迓我也遺言曰吾事親未終於孝愛弟未終於仁請本郡御書仙靈觀額及麻姑山置廟茲事莫遂奄至形解聖上儻問於我君將此辭以聞言畢異香四來奄忽而化篋藏手詔三十紙壁挂道經五千言前後所賜法衣

七副而金紫者雜綵七百二十八段錢二十六萬七千尊
師盡以幡像香油之供費其餘無幾或調老病貧窶焉帝
聞之流涕賜絹二百匹充其歿養之

闕一字

用錫尊師孝也

度弟思明麻姑廟道士用成尊師仁也御書仙靈觀額立
麻姑山廟用昭尊師願也出中使二人監祭造車輦送還
本鄉二十八年二月二十日殯於舊居麻姑山頂甲子改
葬棺中惟見牙簡香鑪而已尊師應於盛明昇於上清時
春秋三十有七甲子永惟大聖元元皇帝教曰成而不居
死而不亡者斯之謂歟

會命曰天

羽林大將軍臧公墓誌銘

大纏兵者寓內所苦用武者朔漠所懸粵若董戎三軍司帥萬里未易爲也是以累戰必勝所謂與國每守必固所謂扞邊英雄歟忠公歟不然曷以分命山河書勲竹帛者也公諱懷亮字時明莒人也其先周公之祚允自僖伯哀伯正詞魯史太傅太守理迹漢朝克揚厥休不泯於代所從來遠矣公即隋銀青光祿大夫海州總管上柱國東海公滿府君之曾孫皇朝請大夫靈州長史上柱國襲東海公寵府君之孫皇朝散大夫原州司馬贈銀州刺史上柱

國德府君之子少而習書長而事武特稟閒氣雅仗大名
暗合孫吳自比管樂移家共用乃出孝首公用仁足以子
人崇義足以開物弱冠應穿葉附枝舉擢第授長上再遷
果毅都尉三除郎將加銀青光祿大夫莅歷單于安北靈
勝洮鄯安東七州都督護擁旄豐安河源莫門朔方朔川
平盧六軍經畧節度營田大使三入羽林大將軍加冠軍
大將軍上蔡縣開國公至若設奇兵勦勅敵智出人境事
揚天聲經之三邊倏忽四紀舉無遺策動有成功雖李牧
十年武侯五月罔足以議及乎屯禁旅直嚴更遏周牆之

禍萌增鐵障之安國又何加焉自頃卧疾時扶力強飯嘗以匈奴未滅家國所讎長吟朔風太息秋序嗚呼陵谷者地之險有時而遷日月者天之光有時而異況於人乎風瘳彌留以開元十七年八月二十二日薨於平康里之私第時春秋六十有八親友揮淚朝廷歎息逝川歸海長城復隍悲夫以明年七月卜地於白鹿原禮也嗣子定遠將軍前左驍尉翊府左郎將兼檢校左監門衛中郎將上柱國敬廉次子中大夫前安北都護上柱國希莊三子前左金吾衛中候賜緋魚袋上柱國敬之四子前左司禦率府

長史賜紫金魚袋內供奉上柱國奉忠五子前殿中省進

馬上柱國敬泚等並棘風茹荼蘼露泣柏號天自毒負土

空寃用紀石銘將符竹簡自承訪舊遠託馳誠事梗槩於

豐碑情辛勤於絕筆其詞曰

周公錫允魯國因名矢魚興諫納鼎飛聲家傳禮終代有

賢英才子閒出武功特興提兵北壘救敗西鄙保界七州

彌曠四紀無堅不陷無強不却三邊風清萬里雲廓謀慮

縱橫威名昭灼物莫能又運何以長邊也不幸人之云亡

風沙未息松柏已行哀哀孝思冥冥泉壤高山或遷其詞

爰仰庶石銘之可託式蒿里之無爽

雲麾將軍碑

嘗以張子纘承珥貂裘者七葉楊公丕構乘朱輪者十人

下惟一闕四郡守闕四營下都督全德安仁畢下察其考

闕一謹行府下詩書益智筭三年之為下殊歎闕三二九

闕一遼什伍下隨闕一以包欵議者以為良將下節公以

名數見召義勇備下者惟一誠能沮彼勝下兵不以穿四

闕一陣甚下而排厚無下宸翰賜下之私第邊鎮奪闕一

士下俸散於戰人玉帛均於門下庶國家方築壇拜將下

西河郡司馬府君之息女賢和淑慎靜恭貞白移闕下也允

子朝議大夫使持節景城闕下大心正懿文壯武廣孝移忠

惟闕下山不舉燧利倍往昔功省今茲闕下恐桑田或變陵谷

仍遷是題豐石之碑式表先公之墓其詞曰

卓彼茂俗赫乎高門經文緯武翼子謀孫其施及我公克

廣爾祉敦闕下筆遼水渺彌隴山峒闕下悲纏九族戀切三闕下

闕下 闕下 闕下 闕下 闕下 闕下 闕下 闕下 闕下 闕下

闕下 闕下 闕下 闕下 闕下 闕下 闕下 闕下 闕下 闕下

闕下 闕下 闕下 闕下 闕下 闕下 闕下 闕下 闕下 闕下